

Yúsan Shiir Chichamen

MÁRKUS

aarmia nu

Imiakratin Juan̄ka etserkamur̄i

(Mat. 3.1-12; Ruk. 3.1-9, 15-17; Juan̄ 1.19-28)

1 ¹Jūi Jesukristunu shiir chicham nán̄kameawai. Jesukristu Yusa Uchir̄nti. ²Yuska imiakratin Juan̄kan pachis ni etserniur̄in Isayasan ti yaunchu ni Papir̄in̄ juna áamtikramiayi:

“Tisiana, ame wéamur̄m̄in emka wetí tusan winia akatramurun akupeajai. Niisha ame jintimin iwiarattawai. ³Niisha aents atsamunam untsumuk juna títiatui: “Uunta jint̄i iwiarturtarum; naka awajsatarum.”

Nuke áarmaiti.

⁴Wats, aents atsamunam imiakratin Juan̄ imiaittsa pujus étseruk, ““tunaarun Yus asakatrurat” tusarum, enentáim yapaj̄iarum imiantiarum” tímiayi. ⁵Anturkatai tusar ashí Jut̄ia nun̄kanmaya shuar tura Jerusarén peprunmaya shuarsha Nīin̄ tariarmiayi. Taar, ni tunaar̄in̄ ujakarmatai, Juan̄ Jurtañ̄ entsanam imiainiarmiayi.

⁶Juan̄sha kamiriu ur̄e najantramun entsauyayi. Emenmamkesha nuapeyayi. Tura chinij̄iai yutai-títikriatsnasha yuuyayi. ⁷Niisha áentsun ujaak tímiayi “W̄ij̄iāinkia nan̄kaamas ana nu winia ukurūi winittiawai. Niisha nekas ii Uuntri asamtai, wikia tsuntsumpruan ni sapatr̄i jin̄kiamur̄inkisha atitrachminiaitjai. ⁸Wikia entsaj̄ain̄ aya ayashmin imiaajrume, antsu Nīnkia imiantinia áanis Yusa Wakanī atumi enentáin̄ en̄ketramprattarme” tímiayi.

Juan̄ Jesusan imiaimiania nu

(Mat. 3.13-17; Ruk. 3.21-22)

⁹Juan̄ áentsun imiak pujurainiāi, Jesuska Nasarét pepru Kariréa nun̄kanam ana nuyá jiinki Juan̄kan tarimiayi. Tura Juan̄ Jurtañ̄

entsanam Jesusan imiaimiayi. ¹⁰Nuín, Jesus entsayā jiiniuk, nayaimpin uranniun wáinkiamiayi. Tura Yusa Wakanín yámpitsa núnin najanar Níin taarun wáinkiamiayi. ¹¹Tura nayaimpinmayā chichaamun juna antukmiayi, “Ámeke winia aneamu Uchiruitme. Ámin shiir enentáimtajme.”

Uunt iwianch Jesusan anankataj tímiania nu

(Mat. 4.1-11; Ruk. 4.1-13)

¹²Nuyá wárik Yusa Wakaní Jesusan atsamunam jukimiayi. ¹³Tura nuí, yajasma yujamunam, kuarenta tsawant pujumiayi. Nuí pujají uunt iwianch Satanás naartin Jesusan nekapsataj tusa pujurmiayi. Túramtai Jesusan wáinkiatái tusa nayaimpinmayā suntar tariarmiayi.

Kariréa nunkanam ni takatrín Jesus nanakkammiania nu

(Mat. 4.12-17; Ruk. 4.14-15)

¹⁴Ukunam, Juankan sepunam enkeawarmatai, Jesuska Kariréa nunkanam Yusa akupeamurín pachis shiir chichaman etserki támiayi. ¹⁵“Tsawant jeayi. Shuarnum Yusa akupeamurí jeatemai. Tuma asamtai, yaunchu enentáimsamuram yapajjárú, Uwempratin Chicham umirkatarum” tu etserkamiayi.

Jesus namakan achinian ni unuiniamurí ajasat tusa kuaru achikmiania nu

(Mat. 4.18-22; Ruk. 5.1-11)

¹⁶Jesus Kariréa antumianka kánmatkariín wekas, namakan achinian Semunasha ni yachí Antresnasha nekan ajuntuk pujuinian wáinkiamiayi. ¹⁷Wáiniak “Nemartustarum, tímiayi. Namak achiarmena nútiksanak áentsun-əau Yusna arti tusan awajsatjarme” tímiayi. ¹⁸Tura nuyanka ni nekarín ajapa ikiuiniak Jesusan nemarsarmiai.

¹⁹Nuyasha Jesus ishichik arantach wesa, Sepetéu uchirín Jakupun ni yachín Juánasha kanunam ni nekarín apáa pujuinian wáinkiarumiayi. ²⁰Wáiniak, nemartusta tusa untsukarmiayi. Tutai ni aparíncha, ni aparí takarniuríncha kanunam ikiuiniak Jesusan nemarsarmiai.

Jesus iwianchin áishmannumiá jiki akupkamiania nu

(Ruk. 4.31-37)

²¹Nuyá Kapernáum péprunam jeawarmiayi. Nuí Israer-shuara ayampratin tsawantri jeakuí Jesus Israer-shuar iruntainiam wayá Yus-Chichaman unuiniamiayi. ²²Tura ni jintinniuri jintintiarumia nuna iniankas uunt chichamjai Jesus jintiakui ni chichamen anturkar ti enentáimprarmiayi. ²³Nuisha nu iruntainiam áishman iwianchruku ámiayi. Niisha untsukum ²⁴“¿Warí itiurtamkattsamea incha taum,

Nasarénumiá Jesusa? Wikia nékajme. Ámetme Tunaartichu Yúsaiya winiamna nu. In emestamprataj tusam táchamek” tímiayi.

²⁵Tutai, Jesus kakantar chicharuk “Takamátsatá. Ni enentáiya jíinkitia, tájame” tímiayi.

²⁶Tutai íwianch áishman̄kan ukurak ajakniñkiar untsamak kakaar aa jíinkimiayi. ²⁷Nuna wáinkiar, ashamkar nuámtak aniniaisarmiayi. “¿Ausha warinkit. Yamaram chicham warí chichamait? J̄u Jesuska timiá kakaram asa ímia iwianchin akupeatsuk. Iisiana umirainiatsuk” tiarmiayi. ²⁸Tura ti wárik nu túrunamu ashí Kariréa nun̄kanam antunkamiayi.

Jesus Semunka tsatsariñ tsuármiania nu

(Mat. 8.14-15; Ruk. 4.38-39)

²⁹Nuyá Israer-shuara iruntai jeñniá jíinki Jesuska Jakupujai Juanjajisha we, Semun̄ ni yachi Antresjai pujuarmia nui jeawarmiayi. ³⁰Semunka tsatsariñ tsuer peaknum jaa tepemiayi. Núnaka wárik Jesusan ujakarmiayi. ³¹Nuiñkia Jesus werí uwejn̄um achik iniantkimiayi. Tura nu chichamaik michatramiayi. Michatar, péñker ajas, Jesusnasha ni nemarniur̄ncha ayurawarmiayi.

Untsurí jaan Jesus péñker awajsarmiania nu

(Mat. 8.16-17; Ruk. 4.40-41)

³²Nu tsawantai kiarai, ashí jáinian, iwianchrukuncha Jesusan itiararmiayi. ³³Tura ashí nú péprunmaya shuar taar wáitiniam Jesusan káutkarmiayi. ³⁴Untsurí shuáran chíkich sun̄kuraim jáinian Jesus tsuararmiayi. Tura iwianchruku armia nuna enentáiyān iwianchin jíirkiarmiayi. Jesuska íwianch nékamu asa, winia náarun ántar pachisaraiñ tusa suritkiarmiayi.

Kariréa nun̄kanam Jesus Yus-Chichaman etserkamiania nu

(Ruk. 4.42-44)

³⁵Nuyá kashin káshik tsawaatsaiñ Jesus nantaki Yúsan áujсатаj tusa jíinki atsamunam wémiayi. ³⁶Tura Semun̄ ni amikrijjai Jesus wemaanum wéarmiayi. ³⁷Nin wáinkiar “Ashi shuar Ámin eátmainiawai” tiarmiayi.

³⁸Tutai Jesus chichaak “Chíkich péprunmasha arantach wetai. Nui Yusa chichame etserkatai; nuna túrattsan táwitjai” tímiayi.

³⁹Nuna ti ashí Kariréa nun̄kanam Israer-shuar iruntai jeñnam etseras wekaimiayi; tura núnisan̄ iwianchniasha jíiki akupkini wekaimiayi.

Tunamaru shuaran Jesus tsuármiania nu

(Mat. 8.1-4; Ruk. 5.12-16)

⁴⁰Túramtai, ti tunamaru shuar Jesusan seatajtsa tarimiayi. Taa tikishmatar tímiayi “Wakerutakmekka tsuaratin tujinratsme.”

⁴¹Jesus nin waitnentak uwejejai antinmiayi. Antin “Wakerajme. Pénker ajasta” tímiayi. ⁴²Nu chichamaik, Jesus chichakmatai, ni sunkuri menkakamiayi. Tura pénker ajasmiai. ⁴³Túrunamtai Jesus kakantar chicharuk ⁴⁴akupeak “Wáinkiatá, nánkamsam etseraip, tímiayi. Antsu weme, Israer-patirmin iniakmamsata. Túram ashí aents ame pénker ajasmarumin nekaawarat tusam, Muisais aar akupkamiania nu umikiam súsatin ana nu susata” tímiayi. ⁴⁵Tura etserkaip támaitiat, jiinki ni túrunamurin mash etseramiayi. Tura nuna etserka asamtai, péprunam, aents írunmanum wétinian Jesus nakitramiayi, antsu aa atsamunam pujumiayi. Tura ashí nunkanmaya Jesusan tariarmiayi.

Jesus emearun pénker awajsamiania nu

(Mat. 9.1-8; Ruk. 5.17-26)

2 ¹Kapernáum péprunam Jesus ukunam ataksha wémiayi. Jeamtai, ni jeen pujan nekaawarmiayi. ²Tuma asamtai shuar wárik ti untsurí káutkarmiayi. Ti untsurí asamtai, jea piakmiayi; wáitinmasha ankantchauyayi. Jesuska Yus-Chichaman nu aentsun ujaak pujurmiayi. ³Nuinkia ni amikrin emearun kuaru shuar tampumpuawar júkiar Jesusan itiararmiayi. ⁴Tura jeawar, untsurí shuar írunu ásamtai jea wayatniun tujinkiarimiayi. Tuma ásar, yakinini wakar jea urakar, áankawar, tampunam ni amikrin Jesus pujamunam awaintiuawar itiararmiayi. ⁵Tura niisha Jesus nekas tsuártatui tu enentáimmarin Jesus nekáa emearun chicharuk, “Uchirú, ame tunaarumka tsankuramuiti” tímiayi.

⁶Israer-shuara jintinniurisha nuna antúu pujuarmiayi. Tura ni enentáijjai enentáimsar, ⁷“¿Jusha urukamtai emearun tu chichara? Yúsan imiá yajauch chicharui. Warí, yaki tunaan asakarminiait; aya Yúsak tunaan asakarchamniakait” tu enentáimsarmiayi.

⁸Jesuska ni enentáimmarin nekarawar “¿Urukamtia átum tu enentáimprum? tímiayi. ⁹Emearu, tunaarum tsankuramuiti títinjai, emearu, wajakim tampuram entsakim wekasata títinjai ¿tuá imiá yúpichuchit? ¹⁰Wats wi, Aents Ajasu asan Yusa kakarmarijjai shuara tunaari tsankuramniaitjiana nuna paant iwiaintiuktajrume” tímiayi. Nuna tinia emearun chicharuk ¹¹“Wajaktia, tájame; túram tampuram jukim jéemiin wetá” tímiayi. ¹²Nu chichamaik emearu wajaki, tampurin jukí, ashí íimiainiajn jínkimiai.

Nuna túrunamtai ashí ashamkarmiayi. Tura “jútikiamu penké wáinchaitji” tiar Yusa náarin uunt awajsarmiayi.

Jesus Riwin utsukmiania nu

(Mat. 9.9-13; Ruk. 5.27-32)

¹³Nuyá ukunam Jesus antumiannum waketkimiayi. Tura ashí shuar káunkarmatai jintintiawarmiayi. ¹⁴Tura jintintiawar amuk, akupin

akitiai jeanam nankaamak, Arpeu uchirin Riwin pujan wáinkiamiyai. Wáiniak “Nemartusta” tímiyai. Tutai Riwi wajakí Jesusan nemarsamiyai. ¹⁵Chíkich tsawant, Riwisha Jesusan ni jeen itiaamiyai. Tura untsurí kuítian-juu shuarsha, yajauch shuarsha Jesusjái ni unuiniamurijjaisha ashí nuim misanam pujuarmiai. ¹⁶Tura kuítian-juu shuarsha yajauch shuarsha Jesusjái irunar yurumáinian wáinkiar, Pariséu jintinniurisha Israer-shuara jintinniurisha Jesusa unuiniamurin aniasarmiai. “¿Urukantai ame úntrum Jesus, kuítian-juu shuarjái tura yajauch shuarjaisha yuruma?” tiarmiayi.

¹⁷Jesus nuna antuk tímiyai “Jaachu shuar tsuákratniun atsumainiatsui. Antsu jaa ana nu tsuákratniun atsumainiawai. Wats, “pénkeraitjai” tuinia nú shuaran untsuktajtsan táchaitjai; antsu “tunaitjai” tuinia nú shuaran Winia ajasat tusan untsuktajtsan táwitjai” tímiyai.

Yurumtsuk Yus áujSATniun Jesusan aniasarmiania nu
(*Mat. 9.14-17; Ruk. 5.33-39*)

¹⁸Juañka unuiniamurisha Pariséu unuiniamurisha yurumtsuk Yúsan áujiarmiayi. Túmakui chíkich shuar Jesusan tariar chicharainiak, “Juañka unuiniamurisha, Pariséu unuiniamurisha yurumtsuk Yúsan áujainiatsuk; ¿ame unuiniamurmeka urukantai yurumtsuk áujainiatsu?” tiarmiayi.

¹⁹Tutai Jesus chichaak, “¿Nuatma nampernum ipiaamu ainia nu ijiarmawartiniak ainia? Yama nuatu pujakui ni amikri warainiak ijiarmachartin ainiawai. Núnisan winia unuiniamur, Wi pujakui, warainiak yurumtsuk pujuschartin áiniawai. ²⁰Tura tsawant jeattawai, Winia jurukiartin. Nuiñkia winia unuiniamur ijiarmawartatui’ tímiyai Jesus.

²¹Tura nuyá juna tímiyai ‘Mamuru pushí jaanakmatai yamaram tarach anujtukchatniuiti. Túramka nijiam yamaram tarach sumpeak mamushan chiníkiá nuna nankaamas jáaktatui. ²²Nijiamanch yamáí nawar nuap najanamu arutnum yaraachminiaiti. Túramka wakaprua kariak nuap najanamu ijiakratniuiti. Tura nijiamanch ukarattawai. Nuap najanamu yajauch ajastatui. Antsu yamaram nijiamanch yamaram nuap najanamunam yaraatniuiti” tímiyai.

Trikiu nerEN yuawarmiania nu
(*Mat. 12.1-8; Ruk. 6.1-5*)

²³Chíkich ayampratin tsawantai Jesus ajanman ajapén nankaamarmiai. Tura ni unuiniamuri trikiu nerEN majukiar wearmiayi. ²⁴Nuna wáinkiar Pariséu Jesusan chicharainiak “¿Warí, urukantai ame unuiniamuram ayampratin tsawant takastin surimkiamu aisha takainia?” tiarmiayi.

25Tutai Jesus tímiayi “Ii uuntri Tawitia túramuri Yús-Papinium áujsachukaitrum. Niisha ni nemarniurisha tsukamainiak, ni yurumkari atsakui, túrawarmia nu áujsachukaitrum. 26Apiatár Yusnan pujurniu uuntri pujaí Uunt Tawit Yusa Jeen wayamiayi. Tura Tawitkia, patri nankaamas uunt asa, pátrichuitiat, iniaktusma tantan, aya patri yútainiak, yuamiayi; tura ni nemarniurincha ajamsamiayi. Nu áujsachukaitrum, tímiayi. 27Ayampratin tsawantai túrashtinian umirkashtimpiash tusa Yuska aentsun najanachmiayi. Antsu aents ayamprarat tusa Yus ayampratin tsawantan tesamiayi. 28Wisha, Aents Ajasu asan imia ayampratin tsawantan Nerenniurintjai” tímiayi.

Uweje jakan Jesus tsuármiania nu
(*Mat. 12.9-14; Ruk. 6.6-11*)

3 1Ataksha chíkich tsawantai Israer-shuar iruntainiam Jesus wayamiayi. Nuí shuar ámiayi, ni uweje jaka. 2Tura tunáan túrayi titiai tusar wakeruiniak “ayampratin tsawantai tsuártimpiash” tusar, Pariséu shuarsha Jesusan ii pujuriarmiayi. 3Nuinkia Jesus uweje jaka shuaran chicharuk “Ajapén wajasta” tímiayi. 4Nuinkia mamikmaun chicharuk “¿Ayampratin tsawantai péñker túratin yajauch túratniujai tuá imiá péñkerait. Shuar uwemtikratin máatniujai tuá imiá péñkerait?” tímiayi.

Nuna takui niisha pachischarmiayi.

5Tura Jesus kajek nin fiyarmiayi; tura ni enentáin kátsuram ásarmatai kúntuts enentáimsamiayi. Tura shuáran chicharuk “Uwejem iniakmasta” tímiayi. Iniakmarmatai ni uweje jaruku ataksha péñker ajatsamiayi. 6Nuyá Pariséu shuar jíinkiar, Jesus maami tusar Erutis shuarjai áujmatsarmiayi.

Untsurí shuar Jesusan káutkarmiania nu

7Nuyá Jesus ni unuiniamurijjai antumiannum wémiayi. Kariréa nunkanmayá untsurí shuarsha Jesusan nemariarmiayi. 8Untsurí nunkanmayasha káunkarmiayi. Jutía nunkanmayasha, Jerusarén péprunmayasha, Itiumiá nunkanmayasha, Jurtan entsa amainiasha, Tiru tura Setun pepru pujuinia nú nunkanmayasha, untsurí shuar ni túramurin nekaawar, Jesusan káutkarmiayi. 9Untsurí káunkar chanuntawarain tusa Jesus ni unuiniamurin kanuram inianáastarum tusa seamiayi. 10Kame untsurí shuaran Jesus nuik tsuaru asantai, jaa shuar nuí káunkarmiania nu Jesusan antintaj tusar shitianainiakui nuna seamiayi. 11Tura iwianchrukusha Jesusan wáinkiar tikishmatrarmiayi. Untsumainiak “Ame nekas Yusa Uchirínme” tiarmiayi. 12Tura nuna etserkairap tusa Jesuska kakantramiayi.

Jesus tuse shuaran anaikiarmiania nu
(*Mat. 10.1-4; Ruk. 6.12-16*)

13Nuyá Jesus náinnium wakamiayi. Tura anaikiatniun wakerimia nú shuaran untzukmiayi. Tura niisha Jesusan weriarmiayi. 14Tura Niijjai

wekasar Yus-Chichaman unuiniartinian tuse shuáran anaikiarmiayi. ¹⁵Tura sunkur tsuártinian, iwianchcha jiki akupkatniun ni kakarmarin súarmiayi nú shuaran. ¹⁶Ju shuáran anaikiamu ármiai: Semun, Jesus chíkich naarin Pítiur apujtusmiania nu; ¹⁷Sepetéu uchirí Jakupu, ni patai Juánsha; ipiamtajaí métek kakaram ásar matai nuna mai “Puanérjis” naari susamiayi. Nusha shuar chichamjainkia “ipiamta nuke” tawai. ¹⁸Nuyá Antressha, Jiripi, Parturumí, Mateu, Tumas, Arpeu uchirí Jakupu, Tateu, ásump Semun, ¹⁹Jútas Iskariúti. Jesusan ukunam surukmia nú Jútasauyayi. Anaik amukmatai jeá waketrarmiayi.

Yusa Wakanin yajauch chicharna nu
(*Mat. 12.22-32; Ruk. 11.14-23; 12.10*)

²⁰Waketkiarmatai, ti untsurí shuar taarmatai takatri ti akui, yurumátniun jeacharmiayi. ²¹Jesusa shuárisa nuna nekaawar Jesus ti iturchat pujus wáurtsuash tu enentáimsar jukitiai tusar nu jeanam jeiararmiayi.

²²Nuyá Israer-shuara jintinniuri Jerusarénumia táarmiania nu, Jesusan áujmatainiak “Pirsepú enkea asa iwianchrukuiti. Tuma asa uunt iwianchi kakarmarijiaí iwianchin jiki akupeawai” tiarmiayi.

²³Tutai Jesus winitiarum tusa nin untsukmiayi. Tura enentáimtikrataj tusa juna tímiayi: “¿Iwianch Satanáskesha itiu ajapmamatin?
²⁴Chikichik nú nunkanmaya shuar nuámtak kajernaiyakuinkia, nu nunka wari meserchattawak. ²⁵Nuámtak shuar ni shuarijiaí kajernaiyakuinkia nu shuarsha amunaikchartatuak. ²⁶Núnisan ¿Satanáskesha ni suntarijiaí máaniakka itiu rake pujusarat? Amunaikiartatui. ²⁷Nánkamas shuar kakaram shuara jeen wayá, nérenniun jinkiatsuk ni kuítrin kasarkachminiaiti. Antsu nérenniun jinkiá ni kuítrin kasarkamniaiti. ²⁸Nekas tájar me, shuar tunáa ashí túruiniana nuka tsankuramniaiti. Winiasha winia Aparnasha yajauch áujmatusha tsankuramniaiti. ²⁹Antsu Yusa Wakanin yajauch áujmatna nuka tsankurachminiaiti; antsu nu shuar niniki tuke sumamattawai.” ³⁰“Jesuska iwianchrukuiti” tuíniakui Jesus nuní tímiayi.

Jesusa yachi Jesusa nukurí
(*Mat. 12.46-50; Ruk. 5.19-21*)

³¹Nuyá ni yachi ni nukurijiaí taar aa wajasar, Jesusan untsukat tusa akupkarmiayi. ³²Shuar Jesusan téntak pujuarmia nu tiarmiayi “Iis, nukusha, yatsumsha aa wajasar untsurmainiawai.”

³³Tutai Jesus chichaak “Ya ainia winia nukursha yatsursha” tímiayi. ³⁴Nin téntakar pujuarmia nuna iis “Júiti winia nukurka, yatsurka, tímiayi. ³⁵Shuar Yusa wakeramurin uminiana nu winia yatsuruiti, winia umaruiti, winia nukuruiti” tímiayi.

Atsaamin atsaampramiania nu
(*Mat. 13.1-9; Ruk. 8.4-8*)

4 ¹Nuyá jínki antumianka yantamen Jesus ataksha unuiniartinian juarkimiayi. Tura untsurí shuar iruntrarmatai, kanunam enkempramiayi. Shuarsha antumianka káanmatkarin pujuarmiayi. ²Jesuská métek-taku chichamjai ti jintintiarmiayi. Jintintiuk juna tímiayi: ³“Antuktarum. Atsaamin atsaamprataj tusa jíinkimiai. ⁴Atsaamkui ni arakrj jintiá iniararmai. Chínki yakiya káutkar yuawarmai. ⁵Chikichcha kaya írunmanum iniararmai, nunka ishichik ámanum. Tura nunka ishichik asamtai wárik tsapainiarmai. ⁶Tura etsa etsantar sukuám kancape atsa asamtai káararmai. ⁷Chikichcha janjí nupanam iniararmai. Janjísha tsapainiar kanjar ajakrarmai; túram nerekcharmai. ⁸Chikichcha péñker nunkanam iniararmai. Tura tsapainiar nerekarmai, chíkich trainta, chíkich sesenta, chíkich sian nerekarmai. ⁹Kuíshim ákuínkia antuktarum” tímiayi.

(Mat. 13.10-17; Ruk. 8.9-10)

¹⁰Untsurí wearmatai, ishichik Nijijai juakarmiania nu, ni tuse unuiniamurijjai aniasarmiayi “¿Ame jintintiamna nusha warimpiai?” tiarmiayi.

¹¹Tutai Jesus chichaak “Yuska ni akupeamurin atumin paant nekantikramattsa wakerutmarme. Antsu chíkich shuarka aya métek-taku chichamjai jintintiáwartatui. ¹²Íniyatan wáinkiacharat tusa, antukarsha nekaacharat tusa, umirtsuk ni tunaari tsankurnacharat tusa túrattawai” tímiayi.

(Mat. 13.18-23; Ruk. 8.11-15)

¹³Tura tímiayi ‘Wi jintintiajrumna nú métek-taku chicham nekaachurmek. Nu nékachkurmeka jitiurak chíkich métek-taku chichamsha nekaatarum? ¹⁴Atsaamnua nuka Yus-Chichaman étserna nuna nakumui. ¹⁵Jínkiái jintiá iniaarua nuna chíkich shuar ántuiniamun nakumui. Nu shuar chichaman ántuiniawai. Tura antukarmatai Satanás wárik tarí ni enentáin atsaampramun jurawai. ¹⁶Chíkich shuar ántuiniamu kayanam atsaampramua núniskete. Niisha chichaman antukar wárik warainiak umiktasa wakeruiniawai. ¹⁷Tura ni kancape atsakui, aya ishichik katsuiniawai. Tura ukunam, Yus-Chichaman wakeruiniakui shuar kajeram tura chíkich iturchatan wáinkiar Yúsaiya kanainiawai. ¹⁸Chíkich ántuiniamuka janjí nupanam atsaampramua núniskete. Nu shuar Yus-Chichaman ántuiniawai. ¹⁹Ántuiniayat ju nunkanam ana nuna ti páchiniawai. Tuma ásar kuítian tura shiirmachin ti takustinian

wakeruiniawai. Nú wakeramu ni enentáin Yus-Chicham ana nuna kan̄kar emen̄katui. Tuma asamtai nerektinian tujintiiniawai. ²⁰Tura ch̄kích ántuiniamusha pé̄nker nún̄kanam atsaampramua núniskete. Nú shuarsha Yus-Chichaman antukar umiiniawai. Tura nerenawai, ch̄kích shuar trainta, ch̄kích shuar sesenta ch̄kích shuar siansha nerenawai.’

Ūkma ana nu paant nekanattawai
(Ruk. 8.16-18)

²¹Nuyá Jesus juna tímiayi ‘¿Shuar shiripkin ekeemak itíá pitiaknum en̄keattawak. Peaknum wakenam ikiustatuak? Atsá. Antsu misanam ekentsashtinkiait. ²²Núnisan̄ ashí ūkma ana nu ukunam paant nekanattawai. Tura núnisan̄ yamá ishishmasa chichasmasha ukunam paant nekanattawai. ²³Kuíshim ákuin̄kia antuktarum.’ ²⁴Tura nuyá tímiayi ‘Ántarmena nu esetrarum enentáimsarum antuktarum. Urutá pé̄nkerak enentáimsatarum, núnisan̄ Yuska ámin nekaatniun suramsattarme, tura nú núkap patatramsattarme. ²⁵Tuma asamtai shuar núkap takakna nu patatnastatui. Antsu ch̄kích shuar ishichik takakuk jurunkittiwai.’

Yusa akupeamuri júnisaiti

²⁶Nuyá Jesus chichaak juna tímiayi ‘Yusa akupeamuri júnisaiti. Shuar jin̄kiain atsaampratniua núniskete. ²⁷Jin̄kiáin atsaamar, untsurí kanar, tsawar, uruksanpi tusa nákwai. Tura itiura tsapainia núnaka nékatsui. ²⁸Kame jin̄kiái nun̄kanam init aku nin̄ki tsapaatsuk; emka nukareawai, nuyá tuyureawai tura nujamar katsuawai. ²⁹Túruna káakmatai júuktin tsawant jeayi tusar juúniawai.’ (Mat. 13.31-32; Ruk. 13.18-19)

³⁰Ataksha Jesus tímiayi ‘¿Yusa akupeamuri warijiaínk¹ nakumkataj. Warijiaínk¹ métek-takuit? ³¹Mustasa jin̄kiaí araamua nujai métek-takuiti. Nu jin̄kiaisha ashí nan̄kaamas ishitiupchichiti. ³²Tura araam tsapái ashí nan̄kaamas uunt ajawai; tura tsen̄keakmarísha kámpuram asamtai nui mikintranam chin̄kisha shiir ayamainiawai.’

(Mat. 13.34-35)

³³Núnisan̄ Jesus untsurí métek-taku chichamjai Yus-Chichaman ujaamiayi. Nii nekaatniun jearmia nunak ujaamiayi. ³⁴Ch̄kích shuaran aya métek-taku chichamjai ujaamiayi; antsu ni unuiniamurijiai Nin̄ki pujus ashí paant jintintrarmiayi.

Nasencha, entsanCHA Jesus imijiánmia nu
(Mat. 8.23-27; Ruk. 8.22-25)

³⁵Nu tsawantai etsa akaikimtai Jesus ni unuiniamuriñ chicharainiak “Entsa amain katintai” tímiayi. ³⁶Tutai kanunam enkemprarmiayi.

Chíkich shuarnaka káanmatkanam ikiukiar Jesusan kanunam pujan júkiarmiayi. Chíkich kanunmayasha atampriarmiayi. ³⁷Tura nasesha ti nasenkatasa nan_kammiayi; chíchimi kanunam yarána piáktasa ajamiayi. ³⁸Jesuska kanú senkarin atamprus kanúu tepemiayi. Tura, ni unuiniamurj Jesusan ishintiak chicharuk “Uunta ii wayajnia júka pachitmatsmek” tiarmiayi.

³⁹Tutai Jesus nantaki nasen kakantramiayi. Entsanha chicharuk “Takamatsata. Miaku ajasta” tímiayi. Tutai nasesha menkakamiayi, entsasha miaaku ajasmiai. ⁴⁰Túrunamtai Jesus ni unuiniamurj chicharainiak “¿Urukamtai ashamarum? Itiura Yus nekas enentáimtatsrum” tímiayi. ⁴¹Tura imiá ashamainiak “¿Maa júsha yait? Nasesha entsasha nin umirainiatsuk” tunaiyarmiayi.

Jataranmayan iwianchrukun Jesus tsuármiania nu
(*Mat. 8.28-34; Ruk. 8.26-39*)

5 ¹Nuyá antumian amaini Jatara nunkanam jeawarmiayi. ²Jesus kanunmaya jinkimtai áishman iwianchruku, shuar jakáa iwiartainiumiá wárik taa Jesusan inkiunmiayi. ³Nu shuar iwiartainium tuke pujuyayi. Tura jirujainkia nin jinkiaatniun tujinkiarimiayi. ⁴Jirujai nawenmasha, uwejnusha tuke jinkiau ármiayi. Túramaitiat jinkiaarman tsuriar tepet-tepet awajmiayi. Tura ti kakaram asamtai nin nupetkachminiuyayi. ⁵Tuke tsawaiasha káshisha, iwiartainiumsha murasha kayajai ijumak unsumuu wekainiuyayi. ⁶Tura yajayan wáiniak Jesusan tseke tarimiayi; tura tikishmatramiayi. ⁷⁻⁸Túrunamtai Jesus chicharuk “Iwianchiá, ni enentáiya jinkitia, tájame” tímiayi.

Takui íwianch kakantar chichaak “¿Winiasha urukamtai tarutnium, Uunt Nankaamaku Yusa Uchiri Jesúsá? Yus iirmanum wáitkiarsaip, tájame” tímiayi.

⁹Takui Jesus tímiayi “¿Ame náarmesha yait?”

Tutai niisha ayak “Untsurí ásar wikia Untsurí-suntar tu anaikiamuitjai” tímiayi.

¹⁰Nuna ti amik, nu nunkanmaya akuptukajin tusa Jesusan ti seamiayi. ¹¹Nuisha nainnium nuntumas untsurí kuchi shushunmak matsamarmiayi. ¹²Tuma asamtai, kuchiniam enkemátin tsankatrukta tusar Jesusan seawarmiayi.

¹³Tuiniakui Jesus “ayu” tímiayi. Takui íwianch áishman_kainia jinkiar kuchiniam enkemáwarmiayi. Kuchisha ti untsurí, jimiará mir (2.000) áchiawash. Ashí mash nánatanam iniaawar antumiannum iniankarmiayi. Nuisha entsá kjaraker jakerarmiayi.

¹⁴Túrunamtai kuchin wáinin pisarar péprunmasha shuarnumsha nuna etserarmiayi. Tuma asamtai iyutai tusar ashintiukarmiayi.

¹⁵Túrawar Jesusai jeawarmiayi. Jeawar áishman yaunchu iwianchrukun

yamaikia péñker ajasun pushirín entsar pujan wáinkiar miayi. Wáinkiar ashankarmiayi. ¹⁶Tura waketkiar kuchi túrunamuncha iwianchruku péñker ajasmancha mash etserkarmiayi. ¹⁷Tuma asantai ni nunkeya jiinki wetá tusa seawarmiayi. Jesus kanunam enkemamtai áishman nuik iwianchruku amia nu Jesusan chicharuk ¹⁸“Wi Ámijjaj tuke tsaninkian wekasatjai” tímiayi.

¹⁹Tura núnaka Jesus suritkiamiayi. “Antsu ame jeemiin, áiniurmiin weme, ashí Uunt Yus túrutma nu tura waitnentrampra nusha ujakarta” tímiayi.

²⁰Tutai áishmansha wémiayi. Tura antsu Tekapuris nunkanam Jesus nin péñker awajsamia nuna ashí shuaran ujakmiayi. Nu nunkanmaya shuarka nuna antukar ti enentáimprarmiayi.

Jimiará jaan Jesus tsuármiania nu

(Mat. 9.18-26; Ruk. 8.40-56)

²¹Ataksha Jesus kanujaj katinmatai, aents untsurí Nin irunturarmiayi. Jesuska antumianka káanmatkarí wajamiayi. ²²Tura Israer-shuar iruntaj jea náampruku, ni naari Jairu, támiayi. Taa, Jesusan wáiniak, piniakum tepersamiayi. ²³Piniakumar ti seak, “Winia nawantur jarutui. Winitia, túram péñker ajasat tusam uwejmijjaj antinrukta. Nuinkia jarutkashtatui” tímiayi.

²⁴Tu tímiatai Jesus nijjaj wémiayi. Tura untsurí shuar wena ásar Nin chánuar miayi.

²⁵Nuj pachitkia nuwá ti jaa wémiayi. Niisha tuse uwí numpan ajapeak wáitias pujuyayi. ²⁶Ti untsurí tsuakratin nincha iisu armiayi. Tura iyamsha ti wáitias pujuyayi. Tura ni kuítrincha ashí ajapaitiat tsuámarchauyayi; antsu tsuamsha nu arant ajauyayi. ²⁷Nu nuwasha, Jesus túramun antuku asa, ni ukuurini amainian ni pushirín antinmiayi. ²⁸“Wi aya ni pushirín antin naka péñkerapi ajasaintjia” tu enentáimiar túramiayi. ²⁹Tura Jesusa pushirín antin nú chichamaik numpa ájapman menkakamiayi. Péñker ajasman ayashin nekapramiayi. ³⁰Tura nuin Jesuska, ni kakarmarjjaj tsuarman nekapmampramiayi. Tura nuna nekáa, ayantar chichaak “¿Yaki winia pushirun antinruka?” tímiayi.

³¹Tutai ni unuiniamurí tiarmiayi, “Untsurí Ámin antinmainiasha ¿urukamtai “yaki winia antintkia” tame?”

³²Tura Jesus, yaki túruta tusa ashi íimpramiayi. ³³Nuinkia nuwasha, ni ayashin túruna nuna nekáa, ti ashamak kuraimiayi. Tura Jesusan jeari tikishmatramiayi. Tura ni túrunamurín ashí paant ujakmiayi. ³⁴Takui Jesus nin chicharuk “Nawantru, Winia nekas enentáimtursa asakmin, péñker awajtamsaitme. Shiir wetá, tura tuke péñker pujusta” tímiayi.

³⁵Tura Jesus nuna tuke chichas pujaj, iruntaj jea uuntri jeenia tariarmiayi. Tariar chicharainiak “Ame nawantrum jakayi. ¿Urukamtai Unuikiartin tuke itit awajsatam?” tiarmiayi.

³⁶Tura Jesuska, nii tiarmia nuna ántayat, núnaka pachitsuk, iruntai jea uuntrin chicharuk “Ashamkaip; áyatik nekas enentáimtursata’ tímiayi.

³⁷Tura Nijjiaí wétinian aya Pítruncha, Jakupuncha ni yachi Juanjaí tsan̄katkarmiayi. ³⁸Iruntai jea uuntri jeen jeawar, áentsun charaatum ajainian, útainian untsukum ajainiancha Jesus wáinkiamiayi. ³⁹Tura nuwach penké jakan nékayat, wayá nin chicharuk “¿Urukamtaí timiá útrum, tura wa wa ajarum? Nuwach jákachai, antsu kanarai” tímiayi.

⁴⁰Nuna takui wishikrarmiayi. Tura Jesus ashí jjiir akupkarmiayi. Áyatik nuwachí aparín, nukuríncha tura Nijjiaí táaruncha nuwachí tepamurín jukimiayi. ⁴¹Tura wayawar Jesuska nuwachí uwejeñ achik tímiayi “Taritia kumi.” Nusha shuar chichamjainkia “nawantrú nantáktiá” tawai. ⁴²Nuwach tuse uwí takakuya nu, nú chichamaik nantaki wekasamiayi. Túramtai nuí pujuarmiania nu ti enentáimprarmiayi. ⁴³Jesuska chichaak “Atumsha penké etserkairap’ tímiayi. Tura “nuwach ayuratarum” tímiayi.

Jesus Nasarénum pujusma

(Mat. 13.53-58; Ruk. 4.16-30)

6 ¹Jesus nuyá jiiñki ni nunken waketkimiayi. Ni unuiniamurísha nemariarmiayi. ²Nuisha ayampratin tsawant jeamtaí Israer-shuar iruntainiam wayá unuiniamiayi. Tura Jesusan anturkarmiania nu ti enentáimsarmiayi. “¿Jusha tuí unuimiaruit. Ni nekaatniuríncha yaki susait. Tura aentsti tujintiajnia nuna Niisha itiurak tura? ³Jusha karpintírchukait; Marí uchirínchukait. Ni yachísha Jakupusha, Jusesha, Jútassha, Semunsha nékatsjik. Tura ni umaísha juí iijiaí pujuiniatsuk” tiarmiayi. Túrawar Nin nekas enentáimtustinian tujinkiararmiayi.

⁴Túrasha Jesus nin chicharuk “Yúsnan etserniun chíkich nunkanmayaan̄ka shiir anturainiawai. Antsu ní nunkeyan̄ka, ní shuarsha anturainiatsuí” tímiayi.

⁵Tura nuisha, ni nunkenkikia aentsti tujintiamun túratniun tujinkiamiayi. Antsu jaancha aya ishichik ni uwejejaí antin̄ tsuármiayi.

⁶Tura nekas enentáimtacham “¿urukamtaí nusha?” tu enentáimsamiayi.

Nuyasha chíkich péprunam wayá, chíkich péprunam wayá Yus-Chichaman unuúniakní wekaimiayi.

Yus-Chicham etserkatarum tusa Jesus ni

unuiniamurín akupkarmiania nu

(Mat. 10.5-15; Ruk. 9.1-6)

⁷Tuse unuiniamurín untsuk jímiarchik jímiarchik werum Yus-Chicham etserkatarum tusa akupkarmiayi. Tura iwianchin nupetkarat tusa ni kakarmarin̄ súsarmiayi. ⁸Tura chicharuk “Jintiá yurumátniusha jukiirap, uyuntrumíincha kuitcha en̄kearum jukiirap. Antsu aya áanik mashtun̄ jukiirum wetarum. ⁹Sapat uwekatarum, tura entsartincha jímiar jukiirap,

tímiayi. ¹⁰Tura jea wayarmena nuin pujustarum; pujá-pujakuarum nuyá chíkich peprunmasha wetarum. ¹¹Tura nánkamas aents atumin awaintiamainiachkuisha, anturtamainiachkuisha, nuyá jíinkirum, nu shuar yajauch ániawai tusarum, atumí nawę nuńka akakekrum ikiuktiarum. Kame Yus áentsun nekapsattana nú tsawant jeamtai, nu shuarnaka asutiattawai. Sutuma péprunmaya shuarjaj tura Kumura péprunmaya shuarjaj nankaamas nin asutiattawai” tímiayi Jesus.

¹²Nuyá Jesusa unuiniamuri jíinkiar enentái yapajiar Yúsai enentáimtumartinian etserkarmiayi. ¹³Tura iwianchruku enentáiya iwianchin jíirki akupkarmiayi, tura asuitijai yakarar untsurí jáinian tsuararmiayi.

Juanka jakamuri
(*Mat. 14.1-12; Ruk. 9.7-9*)

¹⁴Jesusa náarin tura ni túramurin ashí aents áujmatin ásarmatai, uunt akupin Erutis nuna antukmiayi. Erutiska “Imiakratin Juan jakamunmaya nantakni. Tuma asa ti kakaram takaawai” tímiayi. ¹⁵Tura chíkich shuar “Eríasaiti” tiarmiayi. Chikichcha “Yúsnan etserniuiti, yaunchu etserniuya núkete” tiarmiayi. ¹⁶Erutis nuna antuk “Nekas Juánkaiti. Ni muuken tsupiktinian akupkamiay nu, jakamunmaya nantakniuiti” tímiayi. ¹⁷⁻¹⁹Kame Uunt akupin Erutis, ni yachi Jiripi nuarin nuatkamiayi. Nu nuwá naari Jirutíasaiti. Juansha uunt akupniun Erutisan chicharuk “Yatsumi nuari akintrukchatniuitme’ tímiayi. Tutai nuwá Jirutías Juánkan ti kajerkamiayi. Tura Juánkan máataj tusa wakerimiayi. Túrasa uunt akupin Erutis nuna surimkamiayi. Antsu Juan achikrum sepunam enkeatarum tusa akupkamiayi. ²⁰Juansha tuke enentáijjai Yusa jintin wekainiuyayi. Erutis, ni esetar enentáimniun neka asa Juánkan ashamak Jirutías wakeramurin túrawain tusa suritkamiayi. Kame Erutis Juan étserman nékachuitiat antuktinian wakerimiayi.

²¹Jirutías, itirak máawaj tu pujai, uunt akupin Erutis, ni akiiniamu tsawantri jeamtai, ni suntarincha, Kariréa nuńkanmaya úuntrincha, kuítrintin armia nunasha untsukar, namperan najanamiayi. ²²Nuisha Jirutías nawantri wayá jantsemámtai Erutis tura nijjai nampernum matsamarmia nusha shiir enentáimsarmiayi. Túramtai uunt akupin nuwachin chicharuk “Ame wakeram nu seattia. Wi amastatjai. ²³Nekas tájame, ashí ame seatmena núnaka amastatjai. Wats, seatkumnińkia takakjana nuna jímiapetek nakakan, amastatjai” tímiayi.

²⁴Tutai nuwach jíinki ni nukurín Jirutíasan chicharuk “¿Wariniak seattaj?” tímiayi.

Tutai “Imiakratin Juanka muuke seata” tímiayi.

²⁵Nu chichamaik nuwach wari wayá Erutisan chicharuk “Yamaikia uunt amamkunam Juanka muuken wakerajai” tímiayi.

²⁶Nuna takui uunt akupin ti kuntuts enentáimpramiayi. Tura nii tiniu asa ni amikrĭ matsatainia nu antukaru ásar matai surimkiatniun tujinkiamiayi. ²⁷Tuma asa uunt akupin Juanĭka muuke itiatu tusa ni suntarĭn wárikmas akupkamiayi. ²⁸Túramtai suntar wari we, sepunam Juanĭka muuken tsupikmiayi. Tsupik, amamkunam itia, nuwan susamiayi. Túram achik ni nukurĭn susamiayi. ²⁹Juan maamun antukar ni unuiniamurĭ ni ayashĭn iwarsatai tusar júkiarmiayi.

Senku mir áishmanĭkan Jesus ayuramiania nu

(Mat. 14.13-21; Ruk. 9.10-17; Juanĭ 6.1-14)

³⁰Tura Jesusa unuiniamurĭ Nii akupkarma nu, ataksha wakетки káunak irunturarmiayi. Ashí nii túrawarmia nuna, unuiniararmia nunasha ujakarmiayi. ³¹Tura untsurĭ shuar táiniakui, niisha ankant ajastinniasha yurumátiniuncha tujinkiamiayi. Tuma asamtai Jesus chichaak “Tijĭai wemí aents atsuiniamunam; nuĭ ishichik ayamprarmi” tímiayi. ³²Nuyá Jesus ni unuiniamurĭjĭai kanunam enĭkemprar, aents atsuiniamunam jeatai tusar jíinkiamiayi. ³³Túrasha shuar ni wéenan wáinkiamiayi. Tura “Jesusaiti” tiarmiayi. Tuma ásar ashí péprunmayá untsurĭ shuar tseĭ ashintiukar, ni jeatniunam nákakarmiayi. ³⁴Jesus kanunmayá jíinki ti untsurĭ aents iruntrar matsatun wáinkiamiayi. Murik pénker wáinchataiya núnisanĭ matsatu ásar matai Jesus nin wáitnentrarmiayi. Tura núkap unuiniararmiayi. ³⁵Nuyá kíakui ni unuiniamurĭ Jesusan tariar chicharainiak “Atsamunam pujatsjik; tura yamáí kíatsuk. ³⁶Shuar wari akupkarta. Tijĭuch péprunmasha, shuarnumsha wearti, ni yurumkarĭ sumarmakarat” tiarmiayi.

³⁷Tutai Jesus chichaak “Atumek ayuratarum” tímiayi.

Tutai “Iisha ju shuar ayuratai tusar, ¿jimiara sianĭ kuitĭai yurumak sumaktai tusar wétinkiaitĭai?” tiarmiayi.

³⁸Tura Jesus ni unuiniamurĭn chicharainiak “Tanta takakrum nu iistarum ¿urutmak aa?” tímiayi.

Tutai nekapmarar chichainiak “Tántaka sénkuchikiiti, tura namaksha jímiarchikiiti” tiarmiayi.

³⁹Tutai Jesus tímiayi “Ju shuar chírichriniam pujusarti tusar akupkatarum.”

⁴⁰Anĭkant anĭkant sianĭ siansha, senĭkuenta senĭkuenta iruntrar matsamsarmiayi.

⁴¹Jesuska senĭku tantancha, jímiar namaknasha jusa, yakí nayaimpinmaani íimias Yúsan yumĭnsamiayi. Tura yurumkan púurmiayi. Puur ni unuiniamurĭn súsarmiayi. Namaknasha puur súsarmiayi, ashí shuáran ajamsarat tusa. ⁴²Ashí yurumáwar ejemararmatai, ⁴³puunaruncha, namak ampirmancha achikiar, tuse chanĭkinian áimkiar júkiarmiayi. ⁴⁴Nu yurumkan ti untsurĭ yurumáwarmiayi. Aya áishmanĭkak senĭku mir (5.000) ármiai.

Jesus entsá pátatek wekasamiania nu

(Mat. 14.22-27; Juanĭ 6.16-21)

⁴⁵Nuyá Jesus ni unuiniamurĭn chicharainiak “Kanunam enĭkemprarum, katiĭnkrum amain émaa ajatarum, Petsaitia péprunam. Wisha ju shuaran

ájusjan ikiuktijatjai” tímiayi. ⁴⁶Shuáran áujas ikiuki Yusjají chichastaj tusa náinnium wémiayi.

⁴⁷Tura kirit ajasmanum kánuka antumiannum ajapén nanammiai. Jesuska niñki juakmiayi. ⁴⁸Jesusa unuiniamurísha wia-wiantainiakua ti pimpikiarmiayi, nase tukumma ásar. Nuna Jesus wáiniak tsawartín ishichik ajasmatai entsá pátatek wekas nin jeariarmiayi. Tura nankaamaktiasa wea núnisan wémiayi. ⁴⁹Jesus entsá wekaan ni unuiniamurí wáinkiar, wakanchashit, tu enentáimprarmiayi. Túrawar ti unsumkarmiayi. ⁵⁰Ashí wáinkiar ti ashamkarmiayi. Tura Jesus wárik nin chicharuk “Kakaram ajastarum, wítjai Jesus; ashamprukairap” tímiayi. ⁵¹⁻⁵²Nuñkia entsaya kanunam waka enkempramiayi. Túramtai nasesha majaantmiayi. Ni unuiniamuríntia enentáí kiritia ántsan ásarmatai Jesus yurumkan núkap awajsamia nuna paant nekaatniun tuke tujinkiarimiayi. Tuma ásar yamáí túrunamu itiurak aankia tusar ti enentáimprar sapijmiakarmiayi.

Jinisarítiumiá shuáran Jesus tsuármiania nu
(*Mat. 14.34-36*)

⁵³Nuyanka katíñkiar, Jinisarít núnkanam jeawarmiayi. Jeawar kanun ajuñiarmiayi. ⁵⁴Kanunmaya jíintrarmatai, nu nunkanmaya shuar Jesusan nekaawarmiayi. ⁵⁵Tura “Jesus pujawai” táman antukar, ashí jéanmaya jaan ni peakrintiuk Jesus pujamunam itiaarmiayi. ⁵⁶Tura Jesus wekaak wémia nuísha, péprunmasha, shuar matsatmanumsha, ishichik matsatkamunmasha jaan itiarar jintiá áeprusarmiayi. Túmainiak Jesusan pushirmin antintaj tusar seawarmiayi. Tura ashí antiñkiarmia nuka péñker ajasarmiayi.

Jesus Pariséun áujmatsarmiania nu
(*Mat. 15.1-20*)

7 ¹Pariséusha, Israer-shuara jintinniurísha Jerusaréñnumiá Jesusan tariarmiayi. ²Tura Jesusa unuiniamurín ikijmiatsuk yurumun wáinkiar “Israer-shuara túrutairín túruiniatsui” tiarmiayi. ³(Kame Pariséusha, tura ashí Israer-shuarsha, ni uuntri jintintiamurín umikiar ti núkap ikijmiarar yurumin ármiai. ⁴Péprunmaya tari “ikijmiatsuk yurumashtiniaiti” tiniu ármiai. Tura ti untsurí ni uuntri túrutairí núnisan ármiai. “Tsapancha, ichinnasha, jiruncha, peaknasha nijiakartiniaiti” tiniu ármiai.) ⁵Tuma asamtai Pariséusha, Israer-shuara jintinniurísha Jesusan chicharainiak “¿Urukamtai ame unuiniamuram ii uuntri jintintramniuitaj nuna túruiniatsu. Urukamtai ikijmiatskesha yurumáinia?” tiarmiayi.

⁶Tutai Jesus tímiayi “Ántar chichamtiniaitru. Isayas yaunchu nekas atumin áartampramiayi juna:

Ju aents ni wenejaj Winia “ti péñkeraiti” turutainiawai, tímiayi Yús, tura ni enentáinkia jeachat pujuiniawai. ⁷Tura tukeneas Winia shiir awajtuiniawai. Aentsu chichame jintiainiyat, “Yús-Chichamaiti” tuñniawai.”

Tu áarmaiti. ⁸Tura átum Yusa chichame iniaisarum, aentsu jintintiamurí umirkarum, ichinnasha, tsapancha nijiaktin, tura chíkich túrutaisha áintsarmek untsurí túrarme. ⁹Túrákrum Yús-Chichamka tsukintiaani ikiusurme atumí uuntri chichame umirkatai tusarum. ¹⁰Kame Muisais yaunchu aar juna tíchamka:

Ame apa nukusha shiir enentáimtustarum.

Tura ataksha áarmiayi:

Shuarsha ni aparín, nukuríncha yajauch chichareakka, nu shuar jákatniuiti.

¹¹⁻¹²Túrasha átumka Pariséutirmeka, antsu ju tárume: “Shuar ni aparín ni nukurín chicharuk “Wi yáinťinian takakjana nu Kurpanaiti” takuinkia, atumsha péñkeraiti, aparíncha nukuríncha yáinťinatí” tarume. (Kurpan tana nuka, Yús susamu, tawai.) ¹³Nekaatarum, Pariséutiram. “Í yaunchu uuntri chichame tuke umiki wétinaitji” tákurum, Yús-Chicham penké ántar chichama núnin awajearme. Núnisrumek chikichcha untsurí túrarme.” Tu timiayi Jesus.

¹⁴Nuyá ataksha Jesus ashí shuáran untsukar “Mash anturtuktarum, ashí nekaatarum, tímiayi. ¹⁵Aaya ayashnium wayaana nu, shuáran yajauch awajsachminiaiti; tura antsu ni enentáinia jinia nu, yajauch awajsattawai. ¹⁶Shuar nuna ántakka enentáimprati” tímiayi.

¹⁷Nuyá áentsun ikuiak, jea wayamtai, ni unuiniamurí aniasarmiayi “¿Nu métek-taku chicham warintua?” tiarmiayi.

¹⁸Tutai Jesus tímiayi “Atumsha nékatsrumek. Páantchakait; yurumak yúajnia nu, enentáiniam wayachu asa, shuáran yajauch awajsachminiaiti. ¹⁹Antsu wakenam wayá, nankaamas menkaatsuk” tímiayi. Nuna taku, ashí yurumak páchitsuk yuamniaiti, tímiayi. ²⁰Nuyá tímiayi “Shuara enentáinia jinia nu, yajauch awajsamniaiti. ²¹Shuara enentáinia, initia, yajauch enentáimsatniusha, tsanirmatniusha, natsa tsanirmatniusha, shuar máatniusha, ²²kasamkatniusha, chikichna wakeruktincha, péñkercha túratniusha, anankatniusha, natsantain átincha, yajauch enentáimtustincha, tsanumpratniusha, waantu enentáimtumastincha, netse túratniusha, ashí nuka initia wininiatsuk. ²³Ashí nu tunáa ainia nu, shuara enentáinia jiniu asa, shuáran yajauch awajainiawai” tímiayi.

Serupinísianmayá nuwá Jesusan nekas enentáimtusmiania nu
(Mat. 15.21-28)

²⁴Tiru pepru, Setún péprusha Serupinísia nunkanam ámiayi. Nuka Israer-shuara nunkencha yayi. Nu nunkanam Jesus wémiayi. Tura

jeá, jeá wayáa pujusmiayi. Tura nuí pujamun nu nunkanmaya shuar nekarawarain tusa nakitmiayi; túrasha uumkatniun tujinkiamiayi. ²⁵Wárik nu nunkanmaya nuwa Jesus pujan nekaamiayi. Nu núwaka nawantri iwianchrukuyayi. Tuma asa Jesusan tarí ni nawen piniakum tepersamiayi. ²⁶Nu nuwa Israer-shuarcha, Serupinísianmayauyayi. Túmaitiat, nawantru enentáiya iwianchin jiiirturkitia tusa Jesusan seamiayi. ²⁷Tutai Jesus nuwan chicharuk “Uchi emka ejemartí. Uchi apatkurí atankir yawach súsatin péñkerchaiti” tímiayi.

²⁸Tutai nuwa ayak “Nekas, Uunta, tame. Tura yawachisha misanam wakenam pujuinia nu, uchi apatkun yurumuk juyumak kákeamun yúniatsuk” tímiayi.

²⁹Tutai Jesus tímiayi “Péñker tame. Tuma asam, shiir wetá; ame nawantrumí enentáiya iwianch jíinkiyi” tímiayi.

³⁰Takui niisha wémiayi. Tura ni jeen jeá, ni nawantrin íwianch jíinkimtai péñker ajas peaknum tepan wáinkiamiayi.

Jesus empekun tsuármiania nu

³¹Jesus Tirunmaya jiinki Setún péprunam nankaamarkutak, Tekapuris nunkanmaani nankaamaki, Kariréa antumiannum ataksha jemiayi.

³²Nuí chichachu ámiayi, kuishin empeku. Nu shuáran Jesusan itiar, ni uwejejai antinkiat tusar seawarmiayi. ³³Shuar matsatmanumiá Jesus nin akanki jukí kuishin tsara uwejejai tsutsukruamiayi. Tura usukia, nu shuara iniaín antintkiamiayi. ³⁴Tura nayaimpinmaani fímias súkaska mayati “Epata” tímiayi. Nuka, shuar chichamnumka “chinkiatí” tawai.

³⁵Nu chichamaik ni kuishisha chinikiamiayi, iniaisha séermiayi. Tura paant chichasmiayi. ³⁶Tura Jesus chicharainiak “Penké etserkairap” tímiayi. Jesuska surí-suritiamaitiat, nu nankaamas etseriarmiayi. ³⁷Tura ti enentáimprarmiayi. Enentáimprar, “Jú Jesus aya péñkeran túrawai. Empekuncha ántumtikniaiti, tura chichachun chichamtikniaiti” tiarmiayi.

Kuatro mir shuáran Jesus ayuramiania nu

(Mat. 15.32-39)

8 ¹Nu tsawantái shuar timiá untsurí iruntrararmiayi. Yurumkarí atsakui Jesus ni unuiniamurin untsukar juna tímiayi: ²“Jú shuáran waitnentajai. Menaintiú tsawant Wijiaí pujuinia ásarmatai ni yurumkarí amuukachaik. ³Tura ni jeen ayurtsuk akupeamka, tsukariin jintiá pimpikiartatui, yajaya káunkaru ásar” tímiayi.

⁴Tutai ni unuiniamurí chichainiak “Túrasha juí atsamunam, ju aents ejemaratat tusar ¿tuyá yurumkak wáinkiattají?” tiarmiayi.

⁵Tutai Jesus nin aniasmiayi “¿Urutmá tanta aa?”

Tutai “siati awai” tiarmiayi.

⁶Nuinkia ashí áentsun “nunká pujstarum” tiarmiayi. Tura tantan achik, Yúsan yumin_samiayi. Tura puuk, áentsun ajamsatarum tusa ni unuiniamur_in susamiayi. ⁷Tura uchich namaksha ishichik aan achik, Yúsan yumin_kias, ni unuiniamur_in chicharuk “Júsha shuar ajamsatarum” tímiayi. ⁸Turam ashí yurumáwar ejemarmiyai. Ampirma púnaruncha siati chan_kinnium áimkiarmiyai. ⁹Kuatro mir (4.000) shuar yurumáwarmiyai. Yurumáwar amikiarmatai, Jesus nin áujas akupkarmiyai. ¹⁰Tura ni unuiniamur_ijjia_i kanunam en_kemprar Tarmanúta nun_kanam wearmiayi.

Pariséu Jesusan iniakmasta tiarmiania nu
(*Mat. 16.1-4; Ruk. 12.54-56*)

¹¹Pariséu Jesusjaj_í áujmatsatai tusar tariarmiayi. Nekapsatai tusar wakeruiniak Nin chicharuk “Nayaimpinmaya_ kakaram iniakmasta” tiarmiayi.

¹²Tuñiakui Jesus kúntuts enentáimias, súkaska mayati “¿Urukamtai, yamaiy_ aentstiram, nayaimpinmaya_ kakarman iniakmasat tusarum wakerarum? Nuka pen_ké sunaschattarme, paant tájarme” tímiayi.

¹³Nuyá nin ikiukiar ataksha kanunam en_kemar amain katin_miyai.

Pariséu túramur_ijjia_i aneartarum, tímiayi Jesus
(*Mat. 16.5-12*)

¹⁴Tura ni unuiniamur_i yurumak jukitiai tukamá kajinmatkiarmiayi. Kanunman_ka aya chikichik tantanak takaku ármiayi. ¹⁵Jesussha ni unuiniamur_in enentáimtikiuk tímiayi “Wáinkiatarum; Pariséusha Erutissha wakaprutain takakainia nújaj_isha aneartarum” tímiayi.

¹⁶Tutai ni unuiniamur_isha tunaiyarmiayi “Tanta kajinmatkin asakrin nuna túramtsujiash” tiarmiayi.

¹⁷Tura Jesus nuna nekáa chichaak “¿Urukamtai aya yurumkak enentáimtarum? Tuke nékatsrumek. Pen_ké enentáimtsurmek. Atumí enentá_i tuke kiritkiait? tímiayi. ¹⁸Jimi a_isha itiura wáintsurmea. Ku_fshim a_isha itiura ántatsrum. Ashí kajinmatkintrumek. ¹⁹Nekaatarum, nuik, sen_ku tantan púuran sen_ku mir áishman_kan ayurachmakaj. ¿Tura ampirma urutmá chan_kinnium chumpiamarum?” tímiayi.

Niisha tiarmiayi “Tuse chan_kinnium chumpiamji.”

²⁰Ataksha Jesus tímiayi “Tura siati tantajaj_í kuatro mir shuaran ayuramtai, ¿ampirmasha urutmá chan_kinnium chumpiamarum?”

Niisha “siati” tiarmiayi.

²¹Tuma asamtai Jesus tímiayi “¿Itiura imiá nékatsrum?”

Jesus kusurun ímtiksamiania nu

²²Nuyá Petsaitia péprunam jeawarmiayi. Jeawarmatai, áishman_ jji kusurun Jesusan itiararmiayi. Túrawar antinta tusar seawarmiayi.

²³Tuma asamtai Jesus uwejn̄um achik péprunam aani en̄keki jukí j̄īn usukij̄j̄ai kuérmiayi. Tura uwejéj̄ai antin̄ “¿íimmek?” tímiayi.

²⁴Tutai kusuru ími tímiayi “Aentsun iij̄ajai, túrasha paantcha. Numi wekainian áaniun iij̄ajai” tímiayi.

²⁵Nuyá ataksha Jesus ni uwejéj̄ai kusuru j̄īn antin̄miayi. Tura kusurusha úmamkes iis, péñker ajas, ashí paant íimpramiayi. ²⁶Jesus chichaak “Jeem̄īn weakum péprunam wayawaip tura shuar ujakaip” tímiayi.

Pítiur Jesusan “Yusa Anaikiamurinme” tímiania nu

(Mat. 16.13-20; Ruk. 9.18-21)

²⁷Jesus ni unuiniamur̄ij̄j̄ai uunt pepru Sesaria-jiripiunam jeatsuk, tíj̄iuch uchich péprunam irasarmiayi. Jintiá wésar Jesus ni unuiniamur̄in̄ chicharainiak, “¿Yaiti turutainiawa Winia?” tímiayi.

²⁸Tutai niisha áimkiarmiayi “Chíkich chichainiak, imiakratin Juan̄kaiti, turamainiawai. Chíkichcha, Eríasaiti, tura chíkichkia, yaunchu Yúsnan etserin nantakniua núiti, turamainiawai” tiarmiayi.

²⁹Tutai Jesus tímiayi “Atumsha, ¿waritrume. Yáitij̄?” tímiayi.

Tutai Pítiur tímiayi “Ámeke Krístuitme; Yúsaiya akupkamuitme.”

³⁰Tutai Jesus chichaak “Peñké etserkairap” tímiayi.

Jesus ni jákatniur̄in̄ ujakmiania nu

(Mat. 16.21-28; Ruk. 9.22-27)

³¹Unuinia: “Wi Aents Ajasuitjiana j̄u ti wáitsatniuit̄j̄ai. Israer-shuarti ii unun̄r̄isha, Patri únun̄r̄isha, ii jintinniur̄isha Winia nakitrurar mantuawartatui. Túrasha maintiu tsawant nan̄kaamasmatai nantaktin̄iait̄j̄ai” tímiayi. ³²Nunasha paant ujakmiayi.

Tura Pítrusha Jesusan arantach jukí kakantramiayi. “Tu chichasaip” tímiayi.

³³Tutai Jesus ayantmatar, ni unuiniamur̄in̄ iis, Pítrun kakantar chicharuk “Satanása, werumta. Ámeke Yusna ana nu enentáimtatsme, antsu aya áentsnak enentáimtame” tímiayi. ³⁴Nuna tuasua amik tura nūj̄ matsamarmia nunasha, ni unuiniamur̄in̄cha untsuk tímiayi, “Shuar Winia nekas nemartustasa wakerakka ni wakeramur̄inkia iniaisati; tura ni krusri yanak̄i nemartustí. ³⁵Kame shuar j̄u nun̄kanam aya niñki anenmamkun̄ka nu shuar ni iwiaakmar̄in̄ emen̄kaktatui. Antsu Winia anentu asa tura winia chichamprun anea asa, shuar aya péñker pujustinniak enentáimtsuna nu, nekas iwiaakman wáinkiattawai. ³⁶Nekaata, shuar ashí j̄u nun̄kanam írunna nuna sumaksha túrasha ni wakan̄j̄ jinium wéakuisha, ¿itiurak péñker pujusaint? ³⁷Shuarka wakan̄in̄ uwemtikrataj̄ tusa wakerak ¿urutmak akikmakaint? ³⁸Antuktarum. Yamaiya aents Yúsán nakit̄iar ajapawaru yajauch ainia nu íimiainiamunam shuar Winia

natsantrakuinnkia tura winia chichampruncha natsantakuinnkia, wi, Aents Ajasuitjiana ju, winia Aparu kakarmarijiai tura nayaimpinmaya pénker suntarjai atak taakun, nú shuaran natsantrattajai Wisha.’ Tu tímiayi Jesus.

9 ¹Ataksha Jesus nin chicharuk, ‘Nekas tájarme, shuar játsuk Yus ni kakarmarijiai aentsu enentáin akupkattana nú tsawantan wáinkiaratna nu jui iijiai pujuiniawai” tímiayi.

Jesus nusháa iira ajasmiania nu

(*Mat. 17.1-13; Ruk. 9.28-36*)

²Nuyá sais tsawant nankaasmatai, Jesus Pítruncha, Jakupuncha, Juánnnasha uunt náinnium júkiarmiayi. Nuisha Jesus nushá iira ajasmiai.

³Ni pushirisha ti puju jíitsumir ajattsarmiayi. Nujai métek puju awajsatin ju nunkanam atsawai. ⁴Túruna nui Erías, Muisaisjai wantinkiar Jesusjai chichainian wáinkiarmai. ⁵Nuyasha Pítiur Jesusan chicharuk “Uuntá, ii jui pujustin ti pénkeraiti. Menaintiú áakmaktai, Áminiu chikichik, Muisaisna chikichik, Eríasnasha chikichik” tímiayi. ⁶Jesusa unuiniamuri sapijmainiak, Pítiur wariniak titi nekaachmai. Nékachu asa nuna tímiayi.

⁷Tura yurankim tara mikintiu awajsamiayi. Yuranminmaya chichaak “Júiti winia aneamu Uchir. Nii anturkatarum” tímiayi.

⁸Nuyanka ni unuiniamuri ayantmar iijaj tukamar aya Jesusnak wáinkiarmai. Chíkichkia atsuarmiayi.

⁹Nuyá náinniumia akainiak Jesus nin chicharuk “Wáinkiarumna nu etserkairap. Wi, Aents Ajasuitjiana ju jakamunmaya nantaatsain nu etserkairap” tímiayi.

¹⁰Tutai ni tímian ímíatrusanu úukarmiayi. Tura “jakamunmaya nantaatsain tana nu, ¿wariniak ta?” nuamtak tunainiarmai. ¹¹Tura Jesusan aniasarmiayi “¿Urukamtaí Israerti ii jintinniurisha, Erías emka tátiniaiti, tuinia?” tiarmiayi.

¹²Tutai Jesus tímiayi “Nekas Erías ashí iwiarattsa emka tátiniaiti. ¿Tura Aents Ajasunun Yus-Papinium warintua?”

“Ti wáitsattawai; Nin nakitrartatui.” Tu áarmaiti.

¹³Wi tájarme, Erías nekas táwiti. Támatai, shuar ashí ni wakeriarmia nuna nin túrawarmiayi. Yusa Papiriin Eríasa túrunatniuri aarma amia tímiatrusanu túrawarmiayi” tímiayi Jesus.

Jesus iwianchin jiiki akupkamiania nu

(*Mat. 17.14-21; Ruk. 9.37-43*)

¹⁴Tura ni unuiniamuri matsatmanum atak wáketuk, ti untsuri aents káutkar Israer-shuara jintinniurisha niijiai tunai pujuinian wáinkiamiayi.

¹⁵Tura aencha, Jesusan wáinkiar warainiak, tsékenki weriar, áujsarmiayi.

¹⁶Túrunawarmatai, Jesus chicharainiak, “Warí tunaiyarum?” tímiayi.

¹⁷Tutai chikichik ayak “Uuntá, winia uchirun Ámin itiarjame. Iwianchruku asa chichachuuti. ¹⁸Túmakui íwianch en̄kentakun̄ paat ajar áepeawai; túram uchisha saun kaput apak nain̄ kátetete awajeawai. Túram kakaakcha ame unuiniamurmin seamjai, jíirtukti tusan, túrasha tujinrutkarai” tímiayi.

¹⁹Tutai Jesus tímiayi “Yúsan enentáimtichutirmea urutmá tsawantak pujustaj atumjaj. Urutmá katsuntrataj! Uchi itiatarum” tímiayi. ²⁰Takui uchin Jesusan itiararmiayi. Tura íwianch uchin en̄kemta Jesusan wáiniak uchin ajakramiayi. Uchisha chichiptur nun̄ká iniaan péper-péper ajakin wenunam saun apakmiayi.

²¹Túrunamtai Jesus ni apar̄in̄ aniasmiayi “¿Urutá yaunchu áinkiait?”

Tutai ni apar̄i tímiayi “Úchichik áinkiaiti. ²²Tuma asa tuke jutikiú pujurniuiti; jiniumsha apeawai, entsá maataj tusa ajuaawai. Yaintrukminiaitkiumka waitneasam yaintrukta” tímiayi.

²³Tutai Jesus chicharuk “¿Urukamtai, yaintrukminiaitkiumka, tame? Nekaata, shuar Winia nekas enentáimturna nu ashí túramniaiti” tímiayi.

²⁴Tutai uchi apar̄i kakantar chichaak, “Uuntá, nekas enentáimtajme. Nekas enentáimtustinian táasjana nu yáintkiata” tímiayi.

²⁵Tura shuar untsur̄i káunainian Jesus wáiniak kakantuk “Empeku chichachu awajin iwianchi jíinkitia, tájame. Jíinkim ataksha wayawaipia” tímiayi. ²⁶Tura íwianch jíiniuk untsamak uchin we-werkasa ajakar chichichiptu áepkimiayi. Túram uchi jaka ímianis tepemiayi. Túrunamtai untsur̄i shuar “jakayi” tiarmiayi. ²⁷Támanak Jesus uwejen achik awajkimiai, tura uchi nantaki wajakmiayi.

²⁸Tura Jesus jeá wayam̄tai, nin̄ki pujusar, ni unuiniamur̄i aniasar “¿Urukamtai iisha jíiktin̄ tujinkiamaj?” tiarmiayi.

²⁹Tutai Jesus tímiayi “Ju iwianchkia ijiarmar Yus áujkur jíikminiaiti” tímiayi.

Jesus ataksha ni jákatniur̄in̄ ujakmiania nu

(Mat. 17.22-23; Ruk. 9.43-45)

³⁰Nuyá jíinkiar Kariréa nun̄kanmaani nan̄kaamakarmiayi. Ni unuiniamur̄in̄ unuinia asa nu nan̄kaamamun nekaawar̄ain̄ tusa Jesus nakitmiayi. ³¹Unuiniaak juna tímiayi: “Wi Aents Ajasuitiaj juna mantamnati tusar achirkar surutkartatui. Tura máamuitiatnak, iwiansamunmayan̄ menaintiú tsawantaj̄ nantaktiatjai” tímiayi. ³²Tura nu chichaman nekaacharmiayi. Nékainiachiat, anintrustinian arantukarmiayi.

“¿Yaki imiá nan̄kaamantuit?”

(Mat. 18.1-5; Ruk. 9.46-48)

³³Nuyá Kapernáum péprunam jeawarmiayi. Tura Jesus jeá pujus ni unuiniamur̄in̄ aniniak, “¿Atumsha jintiá winisrum warí áujmatmiarum?”

tímiayi. ³⁴Tura natsarar pachischarmiayi. Kame jintiá wésar “ijjai ¿yaki imiá nan_{ka}amantu ajasat?” tunainiar_{mi}ayi. ³⁵Ni unuiniamur_i pachischarmatai, Jesus pujus ashí tuse unuiniamur_in irur chichaak “Shuar nekas nan_{ka}amantu ajastajtsa wakerakka, peejchachia nuke enentáimtumar shuara yáin_{tr}i atí” tímiayi. ³⁶Tura uchin itiáa miniakas chichaak: ³⁷“Shuar uchin winia naaru_j shiir awajeakka Winia shiir awajawai. Tura Winia akuptukua nunasha shiir awajawai” tímiayi.

“Shuar in nakitramachku_{ka} in páchitkiawai”

(Ruk. 9.49-50; Mat. 10.42)

³⁸Nuyá Juan_j Jesusan chicharuk “Uuntá, shuar ame náarmin pachis iwianchin akupea wainkiamji. Tura ijjai írutkachu asamtai nu túratin suritkiamji” tímiayi.

³⁹Tutai Jesus tímiayi “Antsu suritkiairap. Shuar winia náarun pachis tujinkiamun túrakka, nu shuar wari tsanumprutratniun tujinkiatawai. ⁴⁰Shuar in nakitramachku_{ka}, in páchitkiawai, tímiayi. ⁴¹Winia nemarka asakrumin shuar yumiichinkesha ajampramkuka ántar túratsui; akikma átatui” tímiayi.

(Mat. 18.6-9; Ruk. 17.1-2)

⁴²Tura shuar ju_j uchin Winia umirtuinia nuna yajauchin túrumtikiamtáin_{ka}, ti asutniatawai. Tuma asamtai uchin yajauchin túrumtiktsáin_j kuntujen kayajai_j jinkiar nayaantsanam ajunmaka maak ainti. ⁴³Ame uwejmek yajauchin túrumtik_kramamniaitkuin_{ka} tsupikta. Mai uwejtuk wáitsatniunam jeatniujain_{ka} chikichík uwejjai_j ju_j nun_{ka}nam pujusar tuke iwiaaku pujustinnium jeatin ti shiiraiti. Warí, wáitsatniunman_{ka} ji kajinkiashtin awai, ⁴⁴jákaru akarisha jáiniatsui tura jisha tuke kapa_{aw}ai. ⁴⁵Nawemsha yajauchin túrumtik_kramamniaitkuin_{ka} nusha tsupikta. Mai nawentuk wáitsatniunam jeatniujain_{ka} chikichík nawejai_j ju_j nun_{ka}nam pujusar tuke iwiaaku pujustinnium jeatin ti shiiraiti. Wáitsatniunman_{ka} ji kajinkiashtin awai, ⁴⁶jákaru akarisha jáiniatsui tura jisha tuke kapa_{aw}ai. ⁴⁷Jimisha yajauchin túrumtik_kramamniaitkuin_{ka} ukuinkiata. Mai jii_{nt}iu_k wáitsatniunam jeatniujain_{ka} chikichík jii_{nt}iu_k ju_j nun_{ka}nam pujusar Yus akupeana nu_j jeatin ti shiiraiti; ⁴⁸wáitsatniunman_{ka} jákaru akarisha jáiniatsui tura jisha tuke kapa_{aw}ai.

⁴⁹Naman_j Yus susamu weaktinia áintsan_j aentstirmesha jijjai_j nekapnastatrum. ⁵⁰Weesha ti pen_{ker}aitiat michumarka, ¿itiurak jea-jeat á_{nt}ink? Wats, wee jeakua áintsarmek atumek shiir enentáimtunaistarum” tímiayi Jesus.

Nuwa_j ajapatniun Jesus áujmatsamiania nu

(Mat. 19.1-12; Ruk. 16.18)

10 ¹Jesus Kapernáumnumia_j jiin_{ki}, Jutía nun_{ka}nam nan_{ka}amaki, Jurtan_j entsa amain jeamiayi. Nu_j pujai_j, aents ataksha Nin

irunturarmiyai. Iruntrarmatai tuke túrin asa ataksha unuiniamiyai.

²Tura Pariséu Jesusan nekapsatai tusar wakeruiniak, Nin chicharainiak “¿Áishman ni nuarí ajapatin tsan̄kamkamukait?” tiarmiayi.

³Tutai Jesus tímiayi “¿Muisais wariniak timia?”

⁴Tutai “Papíjjai in ajapatniun tsan̄katramkamijai” tiarmiayi.

⁵Tutai Jesus tímiayi “Atumí enentai kátsuram asamtai nu chichaman atumin tsan̄katramkamiarme. ⁶Tura Yus yámankamtaik ashí najanamiya nui, áishmannasha nuwancha najanamiyai. ⁷Tuma asamtai áishman ni aparíncha nukuríncha kanaki ikiuki, ni nuaríjjai tsan̄ntiniyai. ⁸Warí, áishman nuaríjjai jímiaraitiat chikichik ajasartatui. Tuma asamtai yamá jímiarchaiti, antsu chikichik ajasuiti. ⁹Tuma asa, Yus atsankiania nuna, aents akankashtiniyai” tímiayi.

¹⁰Tura urum jeá wayawar, Jesusa unuiniamurí nu chichaman ataksha aniasarmiyai. ¹¹Tuiniakui Jesus tímiayi “Shuar ni nuarín ajapa ikiuak chikichan nuátkanka, emka nuarín yajauch awajas, ikiuak, tsanirmayi. ¹²Nuwasha ni áishrí ajapa ikiuak, chikichjai niiniurtukka, niisha tsanirmayi” tímiayi.

Jesus uchin shiir awajsamiania nu

(Mat. 19.13-15; Ruk. 18.15-17)

¹³Antin̄kiarat tusar uchin Jesusan itiararmiyai. Túruiniakui Jesusa unuiniamurí “itiairap” tiarmiayi.

¹⁴Tura Jesus nuna wáiniak, kajek juna tímiayi “Uchi Winí winitin tsan̄katrukatarum. Suritkiairap. Iis, shuar ju uchia núnisan̄ peejchach enentáimtumainia nu Yusa akupeamurín pachiinkiamniai. ¹⁵Nuní asamtai tájarme, uchi umiana núnisan̄ Yusa akupkamurín shuar umíachkun̄ka nuna pachiinkiachminiai. ¹⁶Nuyá uchin miniakas, “Yus yáinmakarti” tímiayi.

Kuítrintin Jesusan áujsamiania nu

(Mat. 19.16-30; Ruk. 18.18-30)

¹⁷Ukunam, Jesus nuyá weai, shuar tseke Nin tarimiyai. Tarí tikishmatar chicharuk “¿Uuntá, Amesha ti péñkeraitme. Tuma asam, turuttia, ¿warinia túrakna tuke iwiaaku átataj?” tímiayi.

¹⁸Tutai Jesus tímiayi, “¿Urukamtai Winia, péñkeraitme, túrutam? Shuarka chikichkisha péñkerka atsawai. Aya Yúsak péñkeraiti. ¹⁹Yus akupkamu nékatsmek. Ju áiniawai: tsanirmawairap, man̄kartuawairap, kasamkairap, chíkich shuar tsanumprurairap, anan̄kartuawairap, apasha nukusha umirkatarum. Nu áiniawai” tímiayi.

²⁰Tutai kuítrintin chichaak “Uunta, núnaka úchichik mash umiki tsakaruitjai” tímiayi.

²¹Tutai Jesus iis waitnenmai tímiayi “Chikichik táasume. Weme ashí áminiu ana nu surukta. Túram nu kuit kuítrincha susarta. Túrakum

nayaimpiniam kuítrum ikiaun_kattme. Túram winitia, krus yanaktinia áintsamek itiurchatrum aín nemartusta” tímiayi.

²²Tura kuítrintin nu chichaman antuk, wake mesek, kúntuts enentáimiar wémiayi, ti kuitrintin asa.

²³Nii wématai, Jesus ashí ni téntakmarín iis, ni unuiniamurín chicharuk, “Kuítrintin ainia nu Yusa akupeamurín pachiinkiatin ti itiurchaiti” tímiayi. ²⁴Takui ni unuiniamurí nuna antukar niisháa enentáimprarmiyai. Túramtai Jesus tímiayi “Uchiru antuktarum. Shuar kuítriniak enentáimtuinia nuka, Yusa akupeamurín pachiinkiatin penké itiurchataiti. ²⁵Uunt kamiriu auja jíin wayatin ana nú nankaamas, kuítrintin Yusa akupeamurín pachiinkiatin itiurchataiti” tímiayi.

²⁶Nuna antukar nú arant niisháa enentáimprarmiyai. “¿Nuiñkia yaki uwempramniait?” tunaiyarmiyai.

²⁷Tura Jesus nin iisar chichainiak “Aents niñki túrachminiaiti, antsu Yus túramniaiti. Yuska ashí túramniaiti” tímiayi.

²⁸Nuyá Pítiur Nin chicharuk “Tis, iikia ashí ikiukir némarksujik” tímiayi.

²⁹Tutai Jesussha tímiayi, “Nekas tájarne, shuar Winia nemartak Yus-Chichamnasha ipiampartasa wakerak ni jeencha, yachíncha, umaincha, aparíncha, nukuríncha, nuaríncha, uchiríncha, nunkencha uyumatsuk ikiuakka, ³⁰nu shuar jü nunkanam sian patatnas jeencha, yachíncha, umaincha, nukuríncha, uchiríncha, nunkencha, jü nunkanam wáitiatat sunastatui. Tura ukunam, nunka amuukamtai, nu shuarsha jáchatainiam tuke penker pujustatui. ³¹Tura untsurí shuar yamáí penkerí ainia nu, ukunam ukunmaaní pujusartatui, tura íksan untsurí shuar yamáí ukunmayá ainia nu, ukunam eem pujusartatui” tímiayi Jesus.

Jesus ni jákatniurí ataksha ujakmiania nu (*Mat. 20.17-19; Ruk. 18.31-34*)

³²Nuyá arak Jerusaréñnum wéenak, jintiak wearmiayi. Jesuska émak wémiayi. Ni unuiniamurísha niisháa enentáimprarmiyai. Ashamainiyatan Jesusan nemarsarmiyai. Túmainiaí atak ni nekas unuiniamurín akankiar, ni túrunatniurín ujakmiayi. ³³Ujaak tímiayi “Antuktarum, arak Jerusaréñnum wéaji. Nui Winia, Aents Ajasuitjiana juna, Patri uuntriíncha, jintinniummasha surutkartatui. Niisha apachnium mantamnati tusar surutkartatui. ³⁴Nusha Winia wishikrurar, katsumprukar, usukruawar mantuawartatui. Túramaitiatnak menaintiú tsawantai nantaktiatjai” tímiayi.

Jakupu Juanjai seawarmiania nu (*Mat. 20.20-28*)

³⁵Sepetéu uchirí Jakupusha Juansha Jesusan taruntarmiyai. Taruntar “Uuntá, ii seattajnia nu túrak tusar wakeraji” tiarmiayi.

³⁶Tutai Jesus tímiayi “¿Warí itiurtukat tusam wakerutam?”

³⁷Tutai “Ame nupetmaktin tsawantrum jeamtai, iisha Ámijjaj pujustaitsar wakeraji, wi untsuurumini, winia yatsursha menaarmini. Nu tsan̄katrukta” tíarmiayi.

³⁸Tura Jesus tímiayi “Átum seatrumna nu nékatsrume. Wi umartatjana nu umarminkaitrum. Tura Wi imiantiatjana núnisrum imianminkaitrum” tímiayi.

³⁹Niisha tiarmiayi, “Túramniaitji, páchitskea.”

Tuñiakui Jesus tímiayi “Wats, Wi umartatjana nu umartatrume, tura Wi imiantiatjana núnisrumek imiantiatrume. ⁴⁰Túrasha winia untsuuruini, menaruiniṣha átum pujustinian Wikia súsashtiniaitjarne, antsu Yus wakerana nu nuñ apujsattawai” tímiayi.

⁴¹Tura chíkich tias unuiniamurí nuna anturkar Jakupuncha, Juánnasha ti kajerarmiayi. ⁴²Tura Jesus ni unuiniamurín irur tímiayi “Ju nékarme; Yus-shuarchanum akupniuitjai tuinia nu, waantu enentáimtumas, ni shuárin ti akupeawai; tura uunt ainia nusha ashí shuar ti takamtikiainiawai. ⁴³Antsu atumjaj núnisan̄ atsutniuiti. Átumka, wi unuiniamutiram, uunt ajastaj tusarum wakerakrumka, ashí yáimin ajastiniaitrum. ⁴⁴Shuar atumí penkerí ajastajtsa wakerakka, takarniua nuke ajas, umirtamkatí. ⁴⁵Wisha, Aents Ajasuitjiana ju, shuar takartusarat tusan táchamjai, antsu ashí shuáran yáintaj tusan táwitjai. Wisha jarukan shuáran uwemtikratajtsan táwitjai” tímiayi.

Jesus Partimiásan tsuármiania nu
(*Mat. 20.29-34; Ruk. 18.35-43*)

⁴⁶Jesus ni unuiniamurijjaj, tura chíkich untsurí aentsjaj Jirikiú péprunam jeawarmiayi. Nuyá Jirikiúnmayasha jíinkiar weenaj, Timiasa uchirí Partimiás, kusuru amia nu, jintiá yantam kuítian seamu pujumiayi. ⁴⁷Niisha, Nasarénumiá Jesusaiti táman antuk, untsumuk “Uunt Jesusa, amesha Uunt Akupin Tawit weeachukaitiam, Yus anaikiachmakaitiam. Winiaja waitnentrurta” tímiayi.

⁴⁸Tura untsurí nuñ matsamarmia nu nin chicharainiak “Takamatsata” tiarmiayi.

Niisha nú nan̄kaamas untsummiayi “Tawit weeá Jesúsá, winia waitnentrurta.”

⁴⁹Nuna antuk Jesus wajatas, chichaak “Untsuktarum” tímiayi.

Takui shuar kusurun untsuuniak “Kakaram ajasta. Wajaktia; untsurmawai” tiarmiayi.

⁵⁰Tuiniakui niisha esekmatairín ajapa ikiuak wajaki Jesusan tseke tarimiayi.

⁵¹Tura Jesus nin chicharuk “¿Winia itiurtukat tusamea wakerutam?” tímiayi.

Tutai kusuru chicharuk “Uunta, ímtiasan wakerajai” tímiayi.

⁵²Tutai Jesus chichaak “Shiir wetá. Winia nekas enentáimtura asam péñker ajasume” tímiayi. Tura nu chichamaik ímpramiayi. Tura Jesusan nemarki wémiayi.

Jesus Jerusaréñnum wayámiania nu

(*Mat. 21.1-11; Ruk. 19.28-40; Juan 12.12-19*)

11 ¹Wésar Jerusaréñnum tura Petpajái péprusha Petania péprusha Uriwiu naint íñkiuasmak ámanum jeawar, Jesus jimiará unuiniamurín ujuikimiayi. ²Ujuiak tímiayi “Aatuniní pépruchiniam werum nuín umpuuru uchich jñkiamu wáinkiatarme. Nu umpuuruکا tuke entsamprukhamuiti. Nu atiarum utitiarum. ³Tura “¿Urukamtia áitkiarum?” turamainiakuisa, “ii Uuntrí wakerawai” titiarum” tímiayi. ⁴Tutai wearmiayi. Tura umpuurun wáitiniam aani jñkiamun, jintiá yantamnum wajan wáinkiar atiawarmiayi. ⁵Nuǐ pujuarmia nu “¿Warí áitkiarum. Urukamtai umpuuru atíarum?” tiarmiayi. ⁶Takui, niisha Jesus timia nu ujakam suritkiacharmiayi. ⁷Tura umpuurun Jesusan itiarar pushirín umpuurunam awantkarmiayi. Túram Jesus entsamkamiayi. ⁸Tura untsurí shuarsha pushirín jintianam ayapar áinkiararmiayi. Chíkichcha jintiá yantamnumiñ nukan juuk jintianam áintrarmiayi. ⁹Eem wearmia nusha, uku winiarmia nusha warainiak “Jusanna” untsamkarmiayi. “Yusa náarín winiana nu imiá péñkeraiti. ¹⁰Ii untrí Tawitia akupeamurí tátatna nu imiá penker atí. Ii Yusrǐ naarǐ shiir ati.” Tu untsamki wearmiayi. ¹¹Tura Jesus Jerusaréñnum jeamiayi. Jeá, Yusa Uunt Jeen wayamiayi. Tura ashí iiyasua amik, kintiamprajǐ tusa ni tuse unuiniamurǐjǐ tǐjǐuch Petania péprunam wearmiayi.

Jesus iikiu numin yumínkramiania nu

(*Mat. 21.18-19*)

¹²Kashin tsawar, Petanianmaya jintia wesa, Jesus tsukammiayi. ¹³Tura arant wajan iikiu numirín núkenniun wáiniak, nereatsuash tusa iyumiayi. Tura nereshtairín asamtai neren penké wáinkiachmiayi. ¹⁴Nuyá iikiu numin yumínkeak: “Ame nerem penké yunaashti” tímiayi. Ni unuiniamurǐsha nuna táman antukarmiayi.

Yusa Uunt Jeen suruktinian Jesus suritkiamiania nu

(*Mat. 21.12-17; Ruk. 19.45-48; Juan 2.13-22*)

¹⁵Nuyá atak Jerusaréñnum jeawarmiayi. Nuǐ Jesus Yusa Uunt Jeen wayá suruktai tusar pujuarmia nuna jǐiki akupkatasa nanǐkammiayi. Kuítian yapajín armia nuna misarín tura yampitsan súrin armia nuna kutanǐkrincha ayanturmiayi. ¹⁶Tura káarak entsaki Yusa Uunt Jeen nanǐkaamaktinian suritkiarmiayi. ¹⁷Nuyá “Yus áusatai tusar ashí shuar

Yusa jeen wayamnia átatui” tú aarchamukait Yusa Papiriin. Antsu átumka Yusa jee kasa matsamtaiya nútikiarme” tímiayi. ¹⁸Aents nui matsamarmia nu Jesusa chichamen antukar ti enentáimprarmiayi. Tuma asamtai Israer-patri úuntri¹sha, Israer-shuara jintinniur¹sha, nuna nekaawar, Jesusan ashamainiak mantamnati tusar chichaman jurusarmiayi. ¹⁹Nuyá kiakui Jesus Jerusaré¹numia jiinkimiayi.

Ikiu numin káarun wáinkiarmania nu

(Mat. 21.20-22)

²⁰Kashin káshik nan¹kaamainiak iikiu numin kan¹kaptuk jaka wajan wáinkiar¹miayi. ²¹Tura Pítiur enentáimias Jesusan tímiayi “Uunta, iista, iikiu Ame yumi¹nkramam nu kan¹kaptuk káarchaik.”

²²Tutai Jesus tímiayi “Yus nekas enentáimtustarum. ²³Iis, nekas tátsujrumek, shuar “Yus nekas túratpiash” tútsuk, tura “wi tájana nuna Yus nekas túrattawai” tu enentáimsar, ju nántian “jiinki nayaantsanam iniánti” tákuin¹kia, páchitsuk inia¹ntatui, tímiayi. ²⁴Tuma asamtai tájar¹me, ashí Yus áujkuram searmena nuna suramsattarme. “Wi seajna nuna yamá takakjai” tu enentáimkiurmeka, wáinkiá¹ttarme. ²⁵Tura Yus áujkuram pujarmena nu, kajerna¹yamuram ákuin¹kia tsan¹kurnáiratarum. Atumí Aparí nayaimpiniam pujana nu atumí tunaar¹in tsan¹kurturti tusarum túratarum. ²⁶Atumsha tsan¹kurnáiyachkur¹minkia, núnisan¹ atumí Aparí nayaimpiniam pujana nu atumí tunaar¹in tsan¹kurtámprash¹tatrumé” tímiayi Jesus.

Yusa kakarmarijia¹ Jesus takasmiania nu

(Mat. 21.23-27; Ruk. 20.1-8)

²⁷Ataksha Jerusaré¹num wakеткиarmiayi. Jesus Yusa Uunt Jeen wekai, Israer-patri úuntri¹sha, Israer-shuara jintinniur¹sha, Israer-shuara iruntai-je¹ úuntri¹sha Nin káutkar¹miayi. ²⁸Káutkar Jesusan tiarmiayi “¿Yana kakarmarijia¹ ju túram. Ame túramna nuna ya tsan¹katrama?” tiarmiayi.

²⁹Tuiniakui Jesus tímiayi, “Chikichkiniak aniatatjar¹me. Áirkatarum. Túrakrumni¹kia Wisha winia takastinian tsan¹katruk¹mia nuna ujaktatjar¹me. ³⁰Wats, turutiarum, ¿ya Juan imiaitniun tsan¹katkama? ¿Shuar tsan¹katkamka? ¿Yus tsan¹katkamka? Áirkatarum” tímiayi.

³¹Tura niisha enentáimprar “Yus akupkai¹” tákurninkia, “¿urukam¹tia umirkachuram?” turamchattajik. ³²Antsu “shuar tsan¹katkai¹” tákur¹kia, ashí shuar ashamaji” tunainiar¹miayi. Ashí aents Juan nekas Yús¹nan etserniuiti, tu enentáimainiakui ashammiarmiayi. ³³Nuyá Jesusan tiarmiayi “Iikia nékatsji.”

Tutai Jesus tímiayi “Wisha núnisnak yana kakarmarijia¹ takaaj nuna ujachhattajrume.”

Yajauch takau armia nu
(*Mat. 21.33-46; Ruk. 20.9-19*)

12 ¹Jesus ju métek-taku chichaman unuiniamiayi: “Shuar uwa ajan ajam wenuimiai. Nuyá uwa nekeetai najanamai. Tura kumpin jean najanamai. Najana takartusti tusa shuáran ikiuak nin¹kia jeachat wémai. ²Neretai tsawant jeamtai, ni takarniurⁱⁿ júukman akankat tusa akupkamai. ³Tura ajanam takau arma nu, nu takarniun achik, katsumkar, áyatik awainⁱⁿkiarmai. ⁴Ataksha chíkich takarniun akupkamai, tura nunasha kayajai tukurar, múuknum katsumkar, katsekar awainⁱⁿkiarmai. ⁵Tuma ain ataksha chíkichan akupkamai, tura nunasha máawarmai. Ti untsurⁱⁿ akupramai. Chikichnasha katsumkarmai, chikichan máawarmai.

⁶Tura nijjai chikichik tuke ámiayi, nuka ni aneamu uchiri. Nu uchinha ukunam akupkamai. Akupeak “Winia uchirnaka shiir awajsartatui” tímiayi. ⁷Tura ni uchiri winian wáinkiar, takau shuar nuámtak chichainiak “Ju¹ka ajá nérenniu uchirⁱⁿti. Wátsek, maatai; túramka ájaka iiniu átatui” tiarmai. ⁸Túsar achikiar máawarmai. Ayashincha ajanmaya ajapawarmai” tímiayi.

⁹Tura nuyá aniasmiayi, “¿Wats, warí enentáimsarum; ajá nérenniuri itiurkattawa? Jeashtanmayá taa, ajá takainia nú shuaran amuktatui. Ni ajarⁱⁿcha chikichan ikiastatui. ¹⁰Ju, Yus-Papinium aarma ana nu áujsachukaitrum:

Kaya péⁿkernak, jeammin “yajauchiiti” tusar ajapawarmia nu ashí kayajai nan¹kaamas péⁿker apujsamuiti. ¹¹Nusha Yus túramuiti. Iisha íisar ti enentáimtaji.

Nuke áarmaiti” tímiayi.

¹²Tura nú metek-taku chichamjai nin áujmatma asa achiktai tusar chichaman jurusarmiayi. Túmainiyat shuáran ashamainiak Jesusan ikiuiniak wearmiayi.

Uunt akupin súsatin tura Yus súsatin
(*Mat. 22.15-22; Ruk. 20.20-26*)

¹³Tura wear, imiaamtikiar yajá chichakmatai nújai yajauch títai tusar Pariséu shuarnasha, Erutisa nemarⁱⁿ shuarnasha akatar Jesusan akuptukarmiayi. ¹⁴Túram Nin jeariar chicharainiak: “Uuntá, aents nakitiainiaⁱⁿ tuke nekas chicham páchitsuk chichaame, nu nékaji. Aents pátatek iiyatsme, antsu nekas Yusa jinti unuiniame. ¿Waritia enentáimiam, ii kuitri uunt Sesar súsatin péⁿkerkait. Susattajik. Suritkiattajik? Nu nekaatai tusar wakeraji” tiarmiayi.

¹⁵Tura Jesus ni yajauch enentáimmarⁱⁿ nekara “¿Urukamtai Winia yajauch titi tusarum wakerutarum? Kuit itiatarum, Wi íistaj” tímiayi.

¹⁶Tutai kuítian itiariarmiayi.

Jesus nuna iis tímiayi, “¿Juísha yana yapí tura yana naari áarmait?” tímiayi.

Tutai “Uunt Sésarna” tiarmiayi.

¹⁷Nuyá Jesus tímiayi “Uunt Sésarna ana nu susatarum; túrarum Yúsnaka Yus susatarum” tímiayi. Tura ni áimkiamurin antukar ti enentáimprarmiayi.

Aents nantaktinian Satuséu anintrusarmiania nu

(Mat. 22.23-33; Ruk. 20.27-40)

¹⁸Nuisha Satuséu aents, jakamunmayá nantaktin penké atsawai tiniu armia nu, Jesusan tariarmiayi. Taar Jesusan chicharainiak: ¹⁹“Uuntá, Muisais juna áatrampramiai:

“Áishman ni nuari júreatsain jakamtainkia, yachin yajutmatrattsá, ni yachi nu wajen nuátkatniúiti.”

²⁰Wats, siati yachi áirmiayi. Iwairi nuwan nuatak yajutmatsuk jakamiayi. ²¹Ni yachi wajen akinkiamiayi. Nusha núnisan yajutmatsuk jakamiayi. Nuna yachisha núnisan tura nuna yachisha núnisan túramiayi. ²²Tura ashí siati patainman, patainman nu nuwan nuátkarmiayi. Yajutmatsuk, yajutmatsuk jíiniawarmiayi. Tura ukunam nuwasha jakamiayi. ²³Nuinkia nantaktin tsawantai, nantakiarmatai, ¿yana nuarin ati? Ashí siati nuátkacharmaka” tiarmiayi.

²⁴Tutai Jesus tímiayi ““Jakamunmayá nantaktin atsawai” tátsurmek. Yusa chichame tura Yusa kakarmari nékachu asarum awajiarne, tímiayi. ²⁵Iimiatarum, aents jakamunmayá nantakiarmatai, nuatnaikiatin atsuttawai, antsu nayaimpinmayá suntara núnisan pujusartatui. ²⁶Tura jakamunmayá nantaktiniapitia tusarum nu nekaatin nekas wakerakrumka Muisais aarmia nu enentáimtustarum. Yuska numichinmayá Muisaisan chicharuk “Wikia Apráama Isaaka tura Jakupu Yúsrintjai” Yus tímiayi. ²⁷Yaunchu jákaru ain, Yus nuna taku, ayashnium jakayat iwiaaku pujuinia nuna Yusrintjai, tawai. Nekas jaka ainia nuna Yusrinchuiti. Nantaktin atsawai tau asarum awajirurme” tímiayi Jesus.

Yus akupkamu imiá péñker ainia nu

(Mat. 22.34-40)

²⁸Jesussha Satuséusha áujmatnainian Israer-shuara jintinniuri taa anturkamiayi. Anturak, Jesus ti péñker áimkiui, niisha Jesusan juna aniasmiayi: “¿Yus akupkamu tuá imiá péñkerait?” tímiayi.

²⁹Tutai Jesus tímiayi “Júiti Yus akupkamu imiá péñker: Antukta Israer shuará. Ii Yusrí úuntaiti, tura Niñki nekas Yúsaiti. ³⁰Tuma asamtai, tuke enentáimjai ti enentáimsam Uunt Yus aneeta. Túram ame iwiaakmarmesha, kakarmarmesha Yus íktusta. Núiti nekas péñker

akupkamu, tímiayi. ³¹Nuyasha chikichcha awai, “ame ayashim aneamna tímiatrusmek ame írutramurmesha aneeta.” Chíkich nu nankaamas péñker akupkamu atsawai’ tímiayi.

³²Tutai jintintin tímiayi “Ee, péñkeraiti, Uunta. Nékasmek tame. Chikichík Yus awai, chíkichkia atsawai. ³³Tura tuke enentáijjiaí ti enentáimsar, ii kakarmarísha Yus íktusar Nin aneakrikia, ii ayashí aneajnia núnik ii írutramurísha aneatniuitji. Nusha ashí Yus sutai ana nujai nankaamas péñkeraiti’ tímiayi.

³⁴Nuna tiniu asamtai Jesus ni péñker áimkian nekáa “Ameja Yus akupeamunam pachiinkiatin ishichik táasume” tímiayi. Tura nuyá chíkich shuar Jesusan aniastinian arantukarmiayi.

Kristu tutai zyana uchirimpait?

(Mat. 22.41-46; Ruk. 20.41-44)

³⁵Jesus Yusa Uunt Jeen unuiniak pujumiayi. Tura chichaak “¿Urukamtai ii jintinniuri “Yus anaikiamu Krístun Tawitia shuari” tuinia?” ³⁶Tawit, antsu, Yusa Wakaní aarta tutai, Yus-Papinium juna áarmiayi:

Uunt winia Úuntrun tímiayi “Ame nemasrumin nupetkatin amuatsajin winia untsuuruinini pujusta”.

³⁷Kame Tawitkia, Krístun áujmatuk, “winia Uuntru” taisha, ¿itiura ní shuarísha átiñk’?” tímiayi Jesus. Tuma asamtai untsurí shuar nui matsamarmia nu ti shiir antukarmiayi.

“Israer-shuaran jintintin ainia nújai aneartarum” Jesus tímiania nu

(Mat. 23.1-36; Ruk. 11.37-54; 20.45-47)

³⁸Jesus unuiniak tímiayi, “Israer-shuara jintinniuri ainia nujai aneartarum. Niisha waantu enentáimtumasar, esaram pushin entsarar wekasatajtsar wakeruiniawai. Péprunmasha shuar shiir áujtusarat tusa wakeruiniawai. ³⁹Israer-shuar iruntainiam penkeri pujutainium pujustinian wakeruiniawai. Nampernumsha penkeri pujutainium pujustinniasha wakeruiniawai. ⁴⁰Tura waje jeencha atantainiawai. Túrawar aents nekaracharat tusar ti esaram chichamjai Yúsan áujainiawai. Nincha chikichjai nankaamas Yus asutiawartatui” tímiayi.

Waje kuítrin susamiania nu

(Ruk. 21.1-4)

⁴¹Jesus Yusa Uunt Jeen kuit enketainiam naka pujus áents kuítrin chumpian wáinkiamiayi. Untsurí kúitrintin núkap enkeawarmiayi.

⁴²Nuyá waje kuítrincha taa jimiará uchich kuítian, reara áantsan, enkeamiayi. ⁴³Jesuska unuiniaturin untsuk “Nekas tájarme, ju waje kuítrinchaitiat, ashí enkeena nú nankaamas núkap enkeayi. ⁴⁴Iis,

kuítrinniusha nii ampirma nuna enkeenawai, tura antsu ju nuwa kuítrinchaitiat, ampirmatsuk ni yurumatniurín takurmakman ashí enkeayi” tímiayi.

Yusa Uunt Jeen yumpuntratniun Jesus ujakmiania nu
(*Mat. 24.1-2; Ruk. 21.5-6*)

13 ¹Yusa Uunt Jeenia Jesus jiinkimtai, unuiniamuri Nin tímiayi “Iisia, Uunta, kayasha ti shiir ániawai. Jeasha imiá úuntchakait.”

²Tutai Jesus tímiayi “Ju imiá uunt jea wáinmek. Kaya ekenramu au ashí mash yumpuntrartatui” tímiayi.

Amuukatin tsawantin uruku átatna nu
(*Mat. 24.3-28; Ruk. 21.7-24; 17.22-24*)

³Nuyá Uriwiu náinnium wakar, Yusa Uunt Jee naka pujusar, Pítrusha, Jakupusha, Juansha, Antressha, níñkimias Jesusan aniiniak ⁴“Uuntá, tímiam nu, ¿urutíá túrunatta. Nu túrunatin jeakuisha itiura nekaattajia? Paant ujatmakta” tiarmiayi.

⁵Tutai Jesus tímiayi “Aneartarum, anankramawairap. ⁶Nekaatarum, untsurí winia naarun pachisar winiartatui. Chíkich chíkich “Wiitjai Kristu” taku, untsurín anankawartatui. ⁷Tura meset chicham ántakrumka, yajaya meset chicham ántakrumsha sapijmiakairap. Nekas túrunashtinkiait. Nujajísha amuukatin tsawantka tuke jeatsui, tímiayi. ⁸Shuar chíkich shuarjají mesetan najanawartatui; apachcha chíkich apachjají núnisanan mesetan najanawartatui. Untsurí nunkanam úurkattawai. Tsukasha ártatui, charaatum ajamusha núnisan átatui. Tura nujají itiurchatka aya yama nanakamui.’

⁹“Túmaitkui atumsha aneartarum. Akupin iruntainiumsha surutmakartatrume, tura íi shuar iruntainmasha katsumpramkartatrume. Wíi shuar asakrumin, kapitíannium, akupniunmasha juramkittiarume. Nují gearum, Winia chichastatrume. ¹⁰Nu túruntsajín ashí áentsnum Yus-Chicham etsernaktiniaiti. ¹¹Atumin surutmaktasar juramainiakusha, warintiajak tusarum ti enentáimsairap. Chichastin jeamtai, Yusa Wakaní jintinramattarmena nu titiarum. Iis, atumí enentájijají tíchattarme, antsu Yusa Wakaní jintintiam títiatrume. ¹²Nu tsawantin shuarsha ni yachín mantamnati tusa suruktatui. Apasha ni uchirín suruktatui. Uchisha aparíncha nukuríncha kajerak, jakati tusa suruktatui. Núnisan untsurí shuar túrawartatui. ¹³Nuiñkia Wíi shuar asakrumin ashí nakitramprartatui. Tura shuar yawetsuk katsuntranaka uwemprattawai” tímiayi.

¹⁴Nuyá Jesus tímiayi “Shuar juna áujeana nu nekaati. Yúsnan etserin, ni naarí Taniar, ti yajauch tuke emesin ana nuna yaunchu aar

etserkamiayi. Nuka pujushtainiam pujan wáinkuirmesha, ashí Jutía nunkanam pujarmena nu, náinnium pisartarum. ¹⁵Jeá yakiini pujana nu akaiki wariri achiktajtsa, jeen wayashti. ¹⁶Ajanam pujana nusha ni pushirin jukitiajtsa waketkishti. ¹⁷Tura ajamtin áiniana nusha, kuírchin umuntsainia nusha, nu tsawantin timiá itiurchatan wáinkiertatui. ¹⁸Tuma asamtai átum pisaarmena nui yumitin achati tusarum Yus seatarum. ¹⁹Nu tsawantinkia ti wáitsatin átatui. Yama nan^ukamtaik Yus nunkan najanama nu^usha, yamaisha ukunmasha timiu wáitsatin pen^uké atsuttawai. ²⁰Tura Uunt Yus wáitsatin tsawantan ishichik awajsattajai tichaitku^uinkia, uwempratin pen^uké atsuinti. Tura ni shuarin anaikiamia nuna yáintajtsa wakerak, nu tsawantan ishichik awajsattawai. ²¹Nu tsawantai “júiti Kristu” túramku^uinkia anturkairap. ²²Kame “Kístuitjai” ántar tuinia nu, tura “Yúsnan etserniuitjai” ántar tuinia nusha wantinkiertatui. Wantinkiar Yus anaikiamu shuárnasha anan^ukatai tusar wakeruiniak, ni kakarmarin iniakmainiak aentsti tujintiamun túrartatui. ²³Tura átum aneartarum. Aetak, túruntsa^uin ujakchajrumek’ tímiayi Jesus.

Aents Ajasu tutai tátintri

(Mat. 24.29-35, 42-44; Ruk. 21.25-36)

²⁴Jesus tuke unuiniak juna tímiayi: ‘Tura nu wáitsatin nan^ukaasmatai, etsaasha nantusha etsantrashtatui. ²⁵Yaasha nayaimpinmaya kakekartatui, tura nayaimpiniam kakaram ainia nu muchirtartatui. ²⁶Nuyasha ashí aents Winia wáitkiartatui. Wi, Aents Ajasuitjiana ju, ti kakaran, ti wincha ajasan, yuranminiam winiái wáitkiartatui. ²⁷Nui nayaimpinmaya suntarun akupkattajai, Wíi shuaran ashí nun^ukanmayan irurarat tusan. Arakaaniya, nun^ukaaniya, ashí nun^uka nan^ukatkamunmayan Wíi shuaran irurartatui.’

²⁸Iikiu numi nakumea nu nekaatarum. Ni chin^ukimpri pun^ukak nuké jeaku^u, “ju nun^ukanam esat jeatemai” tátsurmek. ²⁹Núnisurmek Wi tájarmena nu wáinkuirmeka, ni tátintri jeatemai tu nekaattarme. ³⁰Nekas tájar^ume, yamaí aents pujuinia nu kajin amuiniatsa^uin, ashí Wi tájana nu túrunatniuiti. ³¹Nayaimpisha nun^ukasha amuukatniuiti. Tura winia chichampruka amuukashtiniaiti. ³²Tura tsawantcha nekanachminiaiti. Nayaimpinmaya suntarsha nékainiatsui; Wisha Yusa Uchiríntiatan nékatsjai. Aya winia Aparuk nékawai. ³³Atumsha anearum enentáimprarum Yus aujsa pujustarum, tsawant nékachu asarum.’

³⁴Tura Wikia ju shuarjai méteketjai. Ju shuarsha jeachat weak, ni jeen ikuawai. Ikiuak ni shuarin wáitrukartí tusa apujas ikuak ashí shuaran takatrin súawai. Tura wáitin wáinniun, “ameja pen^uker wáinkiaata” tímiayi. ³⁵Wikia nu jeá nérenniua núnisnak, urutai tátataj nékachu asarum anearum pujustarum. Kíaraimpiash, tura ajapkeash, atash

shiniukaimpiash, káshikiash tátatjai. ³⁶Nérentin aya aneachmak taa, kanúu tepai wáitkiaí tusarum aneartarum. ³⁷Wi atumin tájana nu, ashí shuáran tajai, anearum pujustarum” tímiayi Jesus.

Jesusan chichaman jurusarmiania nu
(*Mat. 26.1-5; Ruk. 22.1-2; Juan 11.45-53*)

14 ¹Jímiarchikí tsawant ajasmiayi paskua tutai námper jeatin. Paskua námpertincha wakapruachu tantan yuatin námpernasha métek najanin ármiayi. Israer-patri uuntrisha, Israer-shuara jintinniurisha Jesusan anan̄kar achikiar maatai tusar wakeriarmiayi. ²Túrasha “Jista tsawantin túrachmi, aents charaatum ajaraiñ tusar” tiarmiayi.

Nuwá kuñkuinian Jesusan ukatramiania nu
(*Mat. 26.6-13; Juan 12.1-8*)

³Jesusha Petania péprunam tunamaru Semun̄ka jeen misanam pujan, nuwá tarimiayi. Nartu kuñkuinian arapástru tutai kaya najanamunam piakun itiamiayi. Nu kuñkuin ti kuitiati. Mutí chuchuke kupik Jesusa muuken kuñkuinian ukatramiayi. ⁴Tura nuí pujuarmia nu, kajerar tunaiarmiayi “¿Urukantai ju kuñkuinian ántar wasurea? ⁵Junasha súrakka, menaintiú siañ kuñknium surukminiuyi. Nu kuitcha kuñtrinchan súsan̄ka maak” tiarmiayi. Tusa nuwān kajerkarmiayi.

⁶Antsu Jesus chicharainiak “Iniaisatarum. ¿Urukantai au kajerarum? Winia shiir túrutayi, tímiayi. ⁷Kuñtrincha atumjai tuke íruntsuk. Wakerakrumka tuke péñker awajsatniuitrume. Antsu Wikia atumjai tuke pujushtatjai. ⁸Ju nuwá ashí nii túramnia núnaka umikiai. Wi jákatin jeatsaiñ, iwiarsatin kuñkuinian shiir ukatrurai. ⁹Nekas tájarme, ashí nun̄kanam Yus-Chicham etsernaktatna nuí, ju nuwá túramurisha etsernaktatui, nin kajinmatkiaiñ tusa” tímiayi.

Jútas Jesusan suruktaj timiania nu
(*Mat. 26.14-16; Ruk. 22.3-6*)

¹⁰Nuyá Jútas Iskariúti, Jesusa unuiniamur̄intiat, Israer-patri uuntrin werimiayi, Jesusan suruktaj tusa. ¹¹Niisha nuna antukar, warasar “Kuit amastatji” tiarmiayi. Jútassha Jesusan itiurak yúpchuch tsan̄kamkattaj tusa enentáimias wekaimiayi.

Jesusjai iruntrar yurumáwarmia nu
(*Mat. 26.17-29; Ruk. 22.7-23; Juan 13.21-30; 1 Kur. 11.23-26*)

¹²Wakapruachu tantan yuatin jísat nan̄kama tsawant tsawarmatai, paskua námpertin yúatin murik máatin jeamtai, Jesusa unuiniamur̄i iniasarmiayi “Paskuatin murikiu yúatin iwaratai tusar ¿tuí wétataji. Tui yurumattam?” tiarmiayi.

¹³Tutai Niisha jimiara unuiniamurin akatar akupeak “Péprunam wetarum. Nui áishman yumin jukí wéa wáinkiatarme. Nu áishman nemarsatarum. ¹⁴Wayana nui jeá nérenniuri títiarum “Uunt túramui, ¿wisha, unuiniamurjai tui yurumáttaj?” ¹⁵Nu nérentin, yakí písunam uunt tesamunam ashí iwiarumun iniakturmastatrume. Nui jísat ii najanatin iwiaratarum” tímiayi. ¹⁶Ni unuiniamuri wear, péprunam jeawar, Jesus timia núnisan wáinkiarimiayi. Tuma ásar paskua námperan iwiararmiayi.

¹⁷Nuyá kíakui Jesus ni tuse unuiniamurijiai wayawarmiayi. ¹⁸Niisha misanam pekaamak, yurumániak pujusar, Jesus tímiayi. “Nekas tájarme, chikichík shuar Wijiai yurumna nu, surutkattawai.”

¹⁹Nujai kúntuts enentáimprarmiayi. Chíkich chíkich Jesusan aniasar “wíashitiaj” tiarmiayi.

²⁰Jesus tímiayi “Ju misanam tuse irunar yurumprum nu, chikichik surutkattawai. Wijiai piniñnum yurumkan ayak yuana núiti. ²¹Nekas Wi, Aents Ajasuitjiana ju, jákatniunam wéajai, áarturma áintsanak. Tura áishman súrutna nu ti wáitsattawai. Niisha akiinmainchu ajakuiti” tímiayi.

²²Yurumainiak Jesus Yúsan yuminkias, yurumkan achik, puuk, chicharainiak “Achiktaram, jusha winia ayashruiti” tímiayi.

²³Piniñnasha achik, Yúsan yuminkias, ni unuiniamurin súsarmiayi. Ashí umararmiayi. ²⁴Umararmatai Jesus tímiayi “Júiti winia numpar, untsurin yáintajtsa puártinia nu. Nujai Yamaram Chichaman Yus najanaiti.

²⁵Nekas tájarme, uwa yumiri ataksha ju umarchattajai. Tura tsawant jeamtai, ukunmasha, Yus akupeana nui yamarman umartatjai” tímiayi.

Pítur natsantratniua nuna Jesus ujakmiania nu
(*Mat. 26.30-35; Ruk. 22.31-34; Juan 13.36-38*)

²⁶Yus-kantan kantámawar, jíinkiar, Uriwiu náinnium wearmiayi. ²⁷Nuinikia Jesus nin tíarmiayi “Ju kashi átum natsantrurtatrume. “Murikui wáinnium máattajai, túramtai murik tsakinmakartatui” tu aarchamukait. ²⁸Tura ukunam Wi nantakin atumin Kariréanam émtuktiajrume” tímiayi.

²⁹Tutai Pítur chicharuk “Ámin ashí natsantramainiakuisha, wikia natsantrashtatjame” tímiayi.

³⁰Tutai Jesus tímiayi “Nekas tájame, ju kashi atash jimiara shiniatsain, natsantrurtatme. “Núnaka nékatsjai” menaintiú turuttiatme” tímiayi.

³¹Tutai Pítur kakaram chichaak “Ámijiai métek máantuiniakuisha, núnaka penké tíchattajai” tímiayi. Ashí ni unuiniamuri núnisan tiarmiayi.

Jesus Jitsemani ajanam Yúsan áujsamiania nu
(*Mat. 26.36-46; Ruk. 22.39-46*)

³²Nuyá Jitsemani ajanam wearmiayi. Jeawar Jesus ni unuiniamurin tímiayi “Jui pujustarum, Yúsan áujsatasa pujai”. ³³Pítrun, Jakupuncha,

Juánnasha jukimiayi. Tura Jesuska ti kuntuts enentáimiar wake mesek nekapsatasa nan̄kammiayi. ³⁴Tura nin chicharuk “Wi ti kuntuts enentáimjai, tura jakamnia nekapeajai. Jūi iimia pujutarum” tímiayi. ³⁵Jesussha ishichik arantach we, nun̄ká piniakumar tepes Yúsán aujmiayi. “Jū wáitsatin átatna nu, túrutatniuitkuin̄kia iniaitiusta” tu seamiai. ³⁶Tuke áujuk tímiayi “Apawá, ashí tujinchaitme. Piniñnumiã ashí umartinia áantsan̄ ti nekapsatajna nú wáitsatniun, jurutkitia. Antsu Wi wakeraj nucha, ame wakeramuram túrunati.” ³⁷Tura ni unuiniamur̄in tarin, kanúu tepenan wáinkiamiayi. Pítrun tímiayi “¿Semun̄ka kánamek. Kanutsuk ishichkisha iimia pujustin tujinkiamék? ³⁸Anearum Yus áujsatarum, tunaanum iniaaraj̄i tusarum. Atumí wakan̄iñ kakarmaitrume, antsu atumí ayash̄iñ kakarmachuitrume” tímiayi. ³⁹Ataksha we, nuik Yúsán áujsama núnisan̄ áujsamiayi. ⁴⁰Ataksha waketruki, ni unuiniamur̄in kanúu tepenan tarimiayi. Kar̄i ti pujá asamtai, Jesusan áujsatniun tujinkiarmiayi. ⁴¹Jesus ataksha we, tarí tímiayi “Kanarum ayampratarum. Máakete. Jeayi. Wi, Aents Ajasuitjiana jū, tunáa shuarnum surukmaitjai. ⁴²Nantáktiárum, wemí. Iis, Winia súrutna nu nuntumsai” tímiayi Jesus.

Jesusan achikiarmiania nu

(*Mat. 26.47-56; Ruk. 22.47-53; Juan 18.2-11*)

⁴³Jesus nuna chicháa pujá unuiniamur̄i Jútas tarimiayi. Nij̄iãi untsur̄i aents puniá takaku, tura numincha takaku káutarmiayi. Israer-patri uuntrī, Israer-shuara jintinniur̄i, tura Israer-shuara úuntrī akupkarma asa káutkarmiayi. ⁴⁴Káuntsaj̄in Jútas chicharainiak, “Wi mukunattaj áujkin núiti Jesus. Achiirum, péñker emetarum jukitiarum” tímiayi. ⁴⁵Tura Jesusan tarí, mukunuk áujas “Uuntá, Uuntá” tímiayi. ⁴⁶Túramtai aencha Jesusan achikiar emetawarmiayi. ⁴⁷Túruiniakui nūi wajatusha puniarī úkuitsan̄, patri uuntrī takarniur̄in awati ni kuish̄in tsupirkamiayi.

⁴⁸Túram Jesus áentsun tímiayi “Kasakaitaj. Puniãj̄i numij̄iãi, kasá nútiksarmek achirkatai tusarum tarutniurme. ⁴⁹Ashí tsawant atumj̄ai Yusa Uunt Jeen wayan̄ unuiniakun pujuchmakaj. Túmaj̄i nūi achirkachmarme. Tura Yus timia nu uminkiat tusa jū túrunayi.” ⁵⁰Nuñkia ni unuiniamur̄i Niniak ikiuiniak pisararmiayi.

Natsa pisarmiania nu

⁵¹Tura áishman̄ nátsaach aya tarachin penumas Jesusan atamprimiayi. Tura natsaach suntar achikiam ⁵²tarachr̄in ajapa ikiuak misú tséken̄kimiayi.

Patri uuntrīin Jesusan júkiarmiania nu

(*Mat. 26.57-68; Ruk. 22.54-55, 63-71; Juan 18.12-14, 19-24*)

⁵³Patri uuntrīin Jesusan ejeniarmiayi. Nūi Patri uuntrīsha, Israer-shuara jintinniur̄isha, Israer-shuara uuntrīsha irunturarmiayi. ⁵⁴Tura

Pítíur íkian nemarki Patri jeen aach jeá, Patri suntarijajai jinia anamuk pujumiayi. ⁵⁵Patri uuntri ashí naamka uunt armia nujajai iruntrar maatai tusar wakeruiniak shuar Jesusan tsanumprurat tusar eatkarmiayi. Nu chichamjai mantamnati, tiarmiayi. Túrasha wáinkiacharmiayi. ⁵⁶Túrasha untsurí shuar Jesusan tsanumpruiniayatan yapajjá yapajjá chichainia ásar matai wáinkiacharmiayi. ⁵⁷Nuyá chíkích wajakiar wáitruiniak juna tiarmiayi ⁵⁸“Yusa Uunt Jeen, aents jeamarmia nuna yumpuntiatjai. Túran menaintiú tsawantai, chikichan, aents jeamchamun jeamtatjai” tau antukmaji” tiarmiayi. ⁵⁹Tura tuke yapajjáwar tiarmiayi.

⁶⁰Nuisha Patri uuntri ajapén wajakí Jesusan chicharuk “¿Áimsatin penké tujintiamék. Warinia turamainia?” tímiayi.

⁶¹Tura Jesus takamtak áimtsuk pujumiayi.

Patri uuntri atak chicharuk “¿Ame nekas Yusa Anaikiamurinkaitiam. Ii Yusri Uunt tajinia nuna Uchirinkaitiam?”

⁶²Tutai Jesus tímiayi “Ee, núitjai. Winia, Aents Ajasu tutaintiajna nu Kakaram Yusa untsuurini pujaj wáitkiattarme. Tura nayaimpinmaya yuranminiam winiaj wáitkiattarme” tímiayi.

⁶³Tutai Patri uuntri kajek, ni pushirin jaak tímiayi “¿Chíkích títincha warí atumaj?” ⁶⁴Nii tana nujajai Yúsán kátsekeamu antukurme. ¿Warintia enentáimprum?” tímiayi.

Takui “jakamniaiti” ashí tiarmiayi. ⁶⁵Chíkích chíkích Jesusan usukiáwarmiayi. Jjin epetkar awatiar “¿Ya áitkiarma? etserkata” tiarmiayi. Patri suntarisha yapiniam awatiarmiayi.

Pítíur Jesusan natsantramiania nu

(*Mat. 26.69-75; Ruk. 22.56-62; Juan 18.15-18, 25-29*)

⁶⁶Núnaka túruiniaj Pítru nunká, jea aani pujan, nuwa Patri uuntri takarniuriya nu tarimiayi. ⁶⁷Niisha Pitrun jinia anamu pujan wáinkiamiayi. Wáiniak, “Amesha Nasarenumia Jesusajai wekaichukaitiam” tímiayi.

⁶⁸Tutai Pítíur chicharuk, “Nékatsjai. Ame támena nuna nékatsjai” tímiayi. Tura aa wáitiainiam jinkimiayi. Tumai atash shiniukmiayi.

⁶⁹Nu núwasha Pitrun ataksha wáiniak, shuáran nuí pujuinian tímiayi “Júiti ni shuari.”

⁷⁰Tura ataksha “atsá” tímiayi.

Ishichik árusan, shuar nuí pujuarmia nu ataksha Pitrun chicharuk “Nekas ni shuarinme. Kariréanmaya shuárchakaitiam. Auya shuara nuní chichaame” tiarmiayi.

⁷¹Tutai Pítrusha kakantar chichaak, “Ju áishmannaka átum tárumna núnaka nékatsjai. Wáitrukuinkia Yus írsati” tímiayi. ⁷²Nuyá ataksha atash shiniukmiayi. Pítrusha, Jesus nuik timian enentáimmiayi. Iis, Jesus nuik tíchamka “Atash jimiar shiniatsajin, ame, núnaka nékatsjai, menaintiu turuttiatme” tíchamka. Pítru nuna enentáimias ti úutmiayi.

Jesusan Piratuí ejeniarmiania nu

(*Mat. 27.1-2, 11-14; Ruk. 23.1-5; Juan 18.28-38*)

15 ¹Tura kashin káshik Patri uuntri, Israer-shuara úuntrijjiaí, Israer-shuara jintinniurijjiaí, ashí naamka armia nujaj irunturar, chichaman jurusarmiaí. Túrawar Jesusan jinkiamun apach kapitían Piratuiin ejeniarmiayi. ²Ejeniarmatai Piratu aniasmiayi “¿Amesha Israer-shuara Uuntrinkáitiam?”

Tutai Jesssha “Amek tame” tímiayi.

³Nuyá Patri uuntri ti tsanumprurarmiayi. ⁴Ataksha Piratu aniasmiayi “¿Áimsatin penké tujintiamek? Ti untsurí etserturmainiatsuk.” ⁵Tura Jesus nunasha áikchamiayi. Túmakui Piratu ti enentáimpramiayi.

Jesusan, mantamnati, tíarmiania nu

(*Mat. 27.15-31; Ruk. 23.13-25; Juan 18.38–19.16*)

⁶⁻⁷Shuar ámiayi, ni naari Parapás. Niisha ni shuarijjiaí meset ámanum, shuaran maa asamtai sepunam enkeamuyayi. Tura námper tsawantai Piratu sepunmayá chikichík shuarnak jjiiki akupniuyayi, aents seawarmia nuna. ⁸Nuisha untsurí shuar Piratun káutkar tiarmiayi “Ame ju námpertin tuke túramna nu túratá. ⁹⁻¹⁰Patri uuntri Jesusan kajeraru ásar surukarmiayi. Piratusha, nuna nekáa chicharainiak “Israer-shuartiram ¿atumí akupniurin jjiiki akupkattajak? ¿Nu wakerarmek?” tímiayi.

¹¹Tutai Patri uuntri áentsun chichainiak ““Antsu Parapás jjikim akúpkatá” titiarum” tiarmiayi.

¹²Tutai Parapásan seawarmatai Piratu ataksha chicharainiak “Jesusnasha, átum ii akupniurí tarumna nuna, ¿itiurkattaja?” tímiayi.

¹³Ataksha ni kakantar tiarmiayi “Krúsnum mantamnati.”

¹⁴Piratusha nin tiarmiayi “¿Warí tunaana túriniait?” tímiayi.

Takui niisha nú nankaamas kakantar tiarmiayi “Krúsnum mantamnati.”

¹⁵Tuma asamtai, aents shiir enentáimprartí tusa, Piratu tunáa shuaran, Parapásan jjiiki akupkamiayi. Tura Jesusnasha katsumkarum krusnum ajintrurtarum tusa suntaran tsankatkamiayi. ¹⁶Tiniu asamtai suntar Jesusan jukiar, kapitíani jeen awayawarmiayi. Nu jea naari Piritiúriuiti. Túrawar untsurí suntaran untsukarmiayi. ¹⁷Ashí káunkar, pushin kapaanniun Jesusan áentsrarmiayi. Tawasap janke najanamun etsenkrumtikiarmiayi. ¹⁸Nuisha Jesusan áujsar “Shíiraitme, Jesúsá, Israer-shuara akupniuriya” wishikiainiak tiarmiayi. ¹⁹Muuknumsha sapapjai awatiarmiayi; nuyá usukiawarmiayi, túrawar ántar tikishmatrarmiayi. ²⁰Tura Jesusan wishikrar amukar, kapaantin pushin áitkiar, ni pushirin áentsrarmiayi. Túrawar krúsnum ajintrurtai tusar jjiikiarmiayi.

Jesusa jakamuri

(*Mat. 27.32-44; Ruk. 23.26-43; Juan 19.17-27*)

²¹ Semun Serini núñkanmayá shuárayayi. Arijantruncha, Rupuncha aparíyayi. Semun kan takatnumiá winian suntar emetawarmiyai, Jesusa krusrin yanaki jukiti tusar. ²² Jesusnasha Kúrkuta náinnium júkiarmiyai. Kúrkuta, shuar chichamjainkia, muuka ukunch naint, tutainti.

²³ Jeawarmatai, karía, mira kunkuinjai pachimprar áartaj tusa susarmiyai Jesusan. Túrasha umarchamiyai. ²⁴⁻²⁵ Nantu yaki jatemsantai krúsnum ayapar ajintrurar ikiusarmiyai. Túrawar suntar yaki jukit tusar nakurutaijai nakurusar Jesusa pushirin yaruakarmiyai. ²⁶ Urukamtai máamuit, ashí aents nuna nekaawarat tusa, ni krusrin ju aarmauyayi: *ISRAER SHUARA AKUPNIURI*

²⁷ Nu náinnium jimiará kasa shuaran Nijjai máawarmiyai. Chikichik Jesusa untsuurini krúsnum, chikichik ni menarini krúsnum máawarmiyai. ²⁸ Yus-Papinium aarma ana nujai uminkiauyayi. Nui “tunáa shuarjai nekapmarmayayi” tu áarmaiti.

²⁹ Shuar nankaamainiak, muuke pearar, Jesusan katsekainiak tiarmiyai “Iisia, amesha, “Yusa Uunt Jeen yumpuntiatjai, tura menaintiú tsawantai ataksha jeamkattajai” tíchakaitiam, tiarmiyai. ³⁰ Amek krúsnumiá akaikim uwemprata.” ³¹ Núnisan Patri uuntrisha, Israer-shuara jintinniurisha Jesusan wishikrar chicharnaisarmiyai “Chikichan uwemtikraitiat, Ninki uwempratnium tujintiawai. ³² Yusa anaikiamuri Krístuashit, ii akupniuriniashit, tiarmiyai. Wats, yamá krúsnumiá akáikití, iisha nu ísar Yus-shuar ajastai” wishikiainiak ántar nuna tiarmiyai. Jesusjai krúsnum ajintruamusha Nin wishikiarmiyai.

(*Mat. 27.45-56; Ruk. 23.44-49; Juan 19.28-30*)

³³ Tutupin jeamtai ti kiritin ajasmiyai ashí nunkanam. Tura, nantu nunkaach ajasmatai ataksha tsaapnirmiyai. ³⁴ Nui Jesus kakantar untsumuk tímiyai “Iruí, Iruí, rama sapaktani.” Nuka shuar chichamjainkia, “Yusrú, Yusrú, ¿urukamtai ajapa ikiurkiniam?” tawai. ³⁵ Shuar nui pujuarmia nu, nu chichaman nékachu ásar, nuna antukar “Eríasan untsúawai” tíarmiyai. ³⁶ Chikichik shuar churuinian uruchjai ajamper, sapapjai ijiú mukunati tusa susamiyai. Tura tímiyai “Wajastarum, Erías Nin jukitaj tusa winishtimpiash. Iistai” tímiyai.

³⁷ Nuinkia Jesus kakaram untsumak jakamiyai. ³⁸ Túramtai Yusa Uunt Jeen ejamu ninki jaanakmiyai, yakíyá nunká. ³⁹ Suntara kapitántrisha Jesusan ayamtus wajamia nu, Jesus kakaram untsumak jaamun iis tímiyai “Nuka ti nekas Yusa Uchiriyayi.”

⁴⁰ Nuwasha arant ii pujuarmiyai. Nu nuwajai Máktara péprunmayá Marí, chíkich Marisha, Sarumáisha pujuarmiyai. Chíkich Marisha uchich

Jakupuncha Jusencha nukuríyayi. ⁴¹Nu núwaka, Kariréa nunkanam Jesus wekaimia nuí, Nin nemarsar yáintaitсар wekasarmiyai. Untsurí chíkich nuwasha Jesusjái Jerusarénum wear, nu nuwajái arant ii pujuarmiayi.

Jesuan iwiarsarmiania nu

(Mat. 27.57-61; Ruk. 23.50-56; Juan 19.38-42)

⁴²Kiatemantai, ayampratin tsawant jeatsain, námper iwiaratin tsawant asamtai, ⁴³Arimiatíanmayá Jusé arantutsuk, kakaram ajas, Piratuí jeá Jesusa ayashin seatajtsa utuamiayi. Nu Jusencha ashí irunin ainia nu anturin ármiyai. Niisha Yus ju nunkanam akupin ajasat tusa nákasmiayi. ⁴⁴Tura Jesusa ayashin seam, Piratusha “wárik jaka” tímiayi. Tuma asa suntara kapitíántrín untsurak “¿Nekas jakayik?” tímiayi. ⁴⁵Tutai kapitíán “Ee” takui, Jesusa ayashin Jusén tsankatkamiayi. ⁴⁶Jusesha puju tarachin péñkeran sumarak, Jesusa ayashin itiar áepas penuarmiayi. Tura yamaram kaya táurmanum ikiusmiayi. Ikius wáitiniam kayan áutumiyai. ⁴⁷Tura Máktaranmayá Marí, Jusé nukurí Marijijái ni ikiuamun ii wajarmiayi.

Jesuan nantakmiania nu

(Mat. 28.1-10; Ruk. 24.1-12; Juan 20.1-10)

16 ¹Tura ayampratin tsawant nankaamasmatai, Máktaranmayá Marisha, Jakupu nukurí Marisha, Sarumáisha, kunkuinian Jesusa ayashin kuertai tusar sumakarmiayi. ²Tura kashin Tumintin, ti káshik, nantu yáma jiniiai, iwiarsamunam jeariarmiayi. ³Wésar chichainiak “Iwiarsamu wáitiri kayancha ¿yaki akanketramkattaj?” tiarmiayi. ⁴Jear uunt kaya akankekman wáinkiararmiayi. ⁵Iwiarsamunam wayawar, natsan esaram puju pushin entsar, untsuurnumaani pujan wáinkiar ti ashamkarmiayi. ⁶Túmainiakui natsa tímiayi “Ashamkairap. Nasarénumiá Jesus krúsnum jakama nu éarme. Iniantkimiuiti. Jui pujatsui. Wátsek, ju ikiusmanum íistarum. ⁷Túrarum werum Pítrusha, chíkich unuiniamurísha ju ujaktarum. Kariréanam atumin émkíyi. Turammarumna núnisan túruna wáinkiatarme” tímiayi. ⁸Niisha ti ashamainiak purushniarar iwiarsamunmayá tseke wearmiayi. Ti ashamainia ásar, chikichkinkesha ujakcharmiayi.

Máktaranmayá Marin Jesus wantintiúkiania nu

(Juan 20.11-18)

⁹Émkaka Tumintin ti káshik Jesus nantaki, Máktaranmayá Marin wantintiúkmiayi. Nu María enentáiyá siati iwianchin Jesus yaunchu ajapruyayi. ¹⁰⁻¹¹Marisha Jesusa nemari kúntuts uutu matsatainian werí, “Jesus iwiaakui, imia wi wainkijai” tímiayi. Támatiat anturkacharmiayi.

Jesus jimiará shuaran wantintiukmiania nu
(Ruk. 24.13-35)

¹²Tura urum jimiaara shuar Jerusarénnumiã tsañin weenan, Jesus nusháa iira ajas tarimiayi. ¹³Niisha Jesusan wáinkiar wakеткиar, unuiniamurin ujakarmiayi, tura ni chichamëncha anturkacharmiayi.

Jesus ni unuiniamurin akupkarmiania nu
(Mat. 28.16-20; Ruk. 24.36-49; Juan 20.19-23)

¹⁴Nuyasha Jesusa auntse unuiniamurin misanam pekaamkar pujuinian Jesus tarimiayi. “¿Atumí enentái urukamtaí kátsuram ainia, urukamtaí Winia nekas enentáimtursachuram?” tímiayi. Ni nantakmiarín wáinkiaru chichamën anturkacharu ásarmataí kakantramiayi. ¹⁵Nuyá chichaak “Ashí nunkanam wetarum. Túrarum ashí shuarum Yusa shiir chichame etserkatarum. ¹⁶Shuar anturak imiani uwemprartatui. Shuar antukcharka, tuke sumamawartatui. ¹⁷Shuar winia náarun pachis, Yúsan nekas enentáimtakka, juna túrawartatui, Yusa kakarmarin iniakmastaj tusa: iwianchin jiki akupkartatui; chíkich chichamjai chichasarukamtaí Winia nekas enentáimturtatui; ¹⁸napincha achiksha, tseasnasha úmaksha, jaa ajaschartatui. Jaa shuaran ni uwejejai antin, nu shuaran péñker awajsartatui.” Tu tímiayi.

Jesus nayaimpiniam wakamiania nu
(Ruk. 24.50-53)

¹⁹Jesus chichas amukmataí, Yus nayaimpiniam jukimiayi. Túruna Yusa untsuurini pujusmiayi. ²⁰Ni unuiniamurisha jíinkiar, ashí nunkanam Yus-Chichaman etserkarmiayi. Tura Uunt Yus nin yáinmiayi. Tura etserainiakui, ashí aents ni kakarmarin nekaawarat tusa, aentsti tujintiamun túratniun susamiayi. Nuke atí.